

Tutu Nuu Nì Tiaa San Pablo nùù Nèhivì xí Dios Ndoó Ñuu Corinto

¹ Yùhù nduí Pablo, te nduú stnài iin ana nì cànà ñà-cucumí chuun ndiaha nùù Jesucristu, vèchi ñà-jaàn nduá nì chitnùnì ini Dios quide. Te yohó cutnàhâ stnài xì ñani-ndà Sóstenes,

² tiaá-nsí tutu yohó nùù nsidaa mii-nsiá nècuàchì natácá cahvi xi Dios ñuu Corinto jaàn. Nèhivì ì xí-yá xínduu stná-nsiá ñà-sàni yàha-nsia ladu xi Stoho-ndà Jesucristu, te nì cànà stná-nsiá cunduu-nsia nèhivì cunihnu ì inì-xi, nahi nsidaa gá nèhivì ndácùcahan xi quivì-yá, vèchi Stoho nsidaa-nda nduú-yá, nahi ndohó, te ducán stná mii-né.

³ Vichi ni cúcúmí cuáhà-nsiá gracia nùù Yua-nda Dios xì nùù Stoho-ndà Jesucristu, te contentu ni cúndóó-nsiá quida-ya.

⁴ Yùhù, nicanicuahàn naquímánì Dios sàhà-nsiá, vèchi cuáhà gá sàni sàhatahvì-yá mii-nsiá sàhà-ñá xínduu-nsia nèhivì xí Jesucristu.

⁵ Nsidanicuú modo sàni nihìtáhvì-nsiá nùù-yá; tùha-nsia càhàn ndiaha-nsiá, te cundáà vaha stná inì-nsia (sàhà ichì-yá).

⁶ Ñàyùcàndüá, na xiní nèhivì (ñà-ndiaha guá) quidá-nsiá vètùnì cundàà ini-nè ñà-ndàà nduá sàni cachi-nsì sàhà Cristu.

⁷ Vèchi có-cùmánì gá ni-inga modo nihìtáhvì gá-nsiá tàhvì ndiaha nùù-yá, te vichi ndiatú

cuéyàà stná-nsià naxicocuïn Stoho-ndà Jesucristu, te cuni-ndàyá.

⁸⁻⁹ Te iin-ni icúmí Yua-nda Dios nacuañhandee ini-yà anima-nsià, dandu mà cóó gà ni-iin falta xi-nsia nùù-yá quìvì naxicocuïn Dèhemani-yá Stoho-ndà Jesucristu. Vàchi vètùni cahvi-nda xi-yá, te mii-yá nduú ana sàni cana-yàndó ñà-cundoo-nda nùù Dèhemani-yá.

Màsà táhndè dava-nda

¹⁰ Sacúndáhvî nùù-nsià ñà-ni nsínúú inì-nsia Stoho-ndà Jesucristu, te màsà nââ stnahá-nsiá, ñáni. Iin-ni iñàha ni cúníhnú vaha ini nsi-daa-nsiá. Màsà táhndè dava-nsia. Iin-ni ni cúndóó mánì-nsiá, te iin-ni iñàha ni nácánì inì-nsia.

¹¹ Vàchi nacánì nèhivì vehe Cloé xí, cachí-nè ñà-sàni tàhndè dava-nsia, ñáni.

¹² Ñà-sàni tàhndè dava-nsia nduá cachí, vachi diín diín iñàha cachí iin iin-nsia. Vachi dava-nsia, cachí-nsià nèhivì xí Pablo nduú-nsiá, te dava-nsia, cachí-nsià nèhivì xí Apolos ò Pedro nduú-nsiá, te dava ga-nsià, nèhivì xí Cristu nduú-nsiá, cachí-nsià.

¹³ Doco, ¿a ndísá ndoó cuáhà partidu xi Cristu? Còó. Té ¿a ndísá nì xihì yùhù Pablo cuenta xi-nsia? Còó. Té ¿a ndísá nì ndacùcahan nèhivì quìvì yùhù na ní cuhì-nsiá? Còó.

¹⁴⁻¹⁵ Yùhù, ni cóni quidá î' cuáhà-nsiá, cuisì Crispo xì Gayo. Ansivéhé Dios, cuisì mii-né nì quida î', còtó cachi nèhivì nì ndacùcahn mii na ní quida î' nècuàchimà.

¹⁶ Pues, ndisa, stná nèhivì vehe Estéfanas nì quida ì stnài, doco có-ìnáhá guê` a ní quida ì gué` más gà nèhivì, á cóó.

17 Vàchi màdì-ñá quida ì' nèhivì nduá nì dandàcú Jesucristu nùí, còó; cuisì ñà-nacani xì-né ñà-nduú razón ndiaha xí-yá, doco màdì ñà-càhàn nchichí uin xì-né cundujàn, còó, còtó mà nàtùì tñũñuhu xí Cristu nansa nì xihì-yà nchìca cruz.

Cuisì ndiaá Jesucristu, màdiá càhàn nchichí-ndà

18 Nèhivì nchìcùn ichì ndé ndañuhu-nda, sácùndiaa uun-ne na càhàn-ndà xì-né sàhà obra nì quida Jesús (na ní xihì-yà) nchìca cruz; doco ndohó nècuàchì dácácu-ya, còó, vachì nùù ndohó, cahnú poder icúmí palabra mà.

19 Cunaha-nsiá, dohó (cachì-yà) nùù tutu ìì: Cuàhìn dandáñúhì nsidaa palabra xícahàn tè-nchichí, xì stná palabra xi nècuàchì tuxí inì-xi ináhá guâ, icúmí dandutí palabra mà, cachì-yà.

20 Ñàyùcànduá, mà cùndiáá gà ñà-nduá cachì guâ tè-nchichí ñuhiví yohó, mate xínduu-tè maestru xi ley sànaaha, te ò yáha ga tùha-tè càhàn-te sàhù. Vachì sàhà obra xi Dios sàni cundaà ini-ndà có-ndiáá palabra tuxí ini nèhivì ñuhiví nduú palabra nchichí guâ.

21 Cuàhà gá nandúcu-né nansa cunchichí-nè, doco Dios, nì chitnùní ini-yà ñà-màdì sàhà ñà-jaàn nihì-né cundaà ini-nè sàhà-yá. Ducán nì quida-ya disponer, vachì nchichí ndisa-ya. Dandu nì chitnùní stná ini-yà ñà-cuitiá palabra ìì xí-yá icutu, te na xiníndísâ nèhivì, dandu vátùni càcu anima-nè, mate (cachì nèhivì) palabra loco nduá.

22 Nècuàchì raza Judea, xicàn-nè cuu iin milagru, (dandu cunindisá-né). Te nècuàchì raza Grecia, cuisì cuní-nè cunini-ne iin palabra chicá nchichí.

²³ Doco nsiùhù, palabra sàhà nansa nì xihì Cristu nchìca cruz nduá cachítnùhu-nsi, mate cudúchí ini nècuàchì raza Judea sàhájàn, te tuxí stná ini nècuàchì inga ñuu palabra diquí nduá.

²⁴ Doco ndohó nèhivì nì nacàxin-ya, sàni cundaà ini-ndà sàhà-yá, ináhà-ndá cahnú cuáhà poder xi-ya, te nchichí ndisa stná-yà. Ducán xiníndísá-ndá, a ducán nduu-nda nèhivì raza Judea, te ò nèhivì inga raza.

²⁵ Vàchi mate ni tuxí ini nèhivì nì càhàn Dios iin palabra diquí, doco cunaha-nsiá, chicá nchichí palabra mà nùù nsidaa ñà-nduá cui cachi nèhivì ñuhiví. Daaní, stná poder xi-ya, mate iyuhu ñà-nduá quidá-yá tuxí ini-nè, doco chicá fuertèàmà nùù nsidanicuú poder xi mii-né.

²⁶ Te xiñuhu nsinuu stná ini-nsià nansa nì quida Dios na ní nacàxin-yàndó ñà-cunduu-nda nèhivì xí-yá, ñàni. Sacu-ndà nduu-nda nècuàchì nchichí cachí nèhivì ñuhiví, te sacu stná-ndà nduu-nda nècuàchì dandacú, te ò nècuàchì cuicà.

²⁷ Doco Dios, nì nacàxin-yàndó, mate mà nchichí-ndà. Te ¿índù chuun? Divi sàhà-ñá dandúcáhán-yá nèhivì cachí xínduu ana nchichí guâ. Stná nèhivì còò poder-xi sàni nacàxin-ya sàhà-ñá nducahan nèhivì tuxí inì-xi chicá icúmí xí poder.

²⁸ Stná nèhivì chicá ndahví nì nacàxin stná-yà, xì stná nèhivì cahíchì ini nècuàchì dava ga, xì stná nèhivì chicá có-ndiàá, pues divi nduú ana sàni nacàxin-ya, te ducán cundee-yá nùù nècuàchì tuxí inì-xi ndiàá guâ.

²⁹ Daaní, quivì icúmí nsidaa nèhivì tnàtuu-ne nùù-yá, mà cúníhnú gá ini ni-iin-ne ñà-mii-né

nduú-né mii-né.

³⁰ Doco ndohó, nùù mii-yá sàni ñìhitáhvi-ndà ñà-cundoo-nda nùù Jesucristu, te datnúù-yà sàxìnítùnì-ndà, dandu níhì-ndà càhàn nchichí ndisa-nda. Te sàhà stná Dèhemanì-yámà sàni ndee vaha-nda nùù-yá, te nì ndoo stná cuàchi anima-ndà nì quida-ya, vachi Dèhemanì-yá nduú ana nì dānāà xì sàhà-ndà, te nì càcu-nda.

³¹ Ñàyùcàndùá, ducán iá nacua cachí nùù tutu ì: “Nú cuní-ndà tavà-ndà tñũñuhu xí mii-nda, dandu nì cúnáhá-ndá ñà-cuisì Stoho-ndà Señor nduú tñũñuhu xi-nda”.

2

Cuisì sàhà Jesús càhàn Pablo xì nèhivì

¹ Yùhù, na ní sàì ñuu-nsià, màdì palabra nchichí nduá nì càhìn xì-nsiá; còó. Nì màdì palabra finu guá nì nácánì xì-nsiá na ní cachitnùhi xì-nsiá ñà-nduú razón ndiaha xí Dios.

² Còó, vachi nì nacani inì ñà-màsà càhìn sàhà inga iin chuun, cuisì-ní sàhà Jesucristu, xì sàhà nansa nì xihì-yà nchìca cruz.

³ Te nì xini-nsià ndè nì cuité, te ndè nì quidi stnái ñà-nàcánì guâ inì

⁴ na ní càhìn xì-nsiá ñà-nduú palabra ì xí-yá. Màdì palabra vico uun xi maestru nchichí nduá nì càchí xì-nsiá daa; còó. Espíritu ì xí Dios nduú ana nì chindee xí, mii-yá xì milagru xi-ya.

⁵ Vachi nì nacani inì mà váha cunchicùn-nsia ñà-nduú iin palabra nchichí xi nèhivì ùún. Còó, micúisi ndudu ì xí Dios nduá cuní cahvi xi-nsiá.

⁶ Doco cunaha-nsiá, palabra nchichí ndisa nduá xichúùn stná-nsì na càhàn-nsì xì nèhivì sàxìníndísâ vaha xi-yá. Doco tucu iá palabra mà nùù ñà-nduá

cáhàn nècuàchì nchichí ñuhìví yohó, te ò iin palabra cáhàn tè-xídandacú ñuhìví yohó. Vàchi mate ndee cáhàn-te, doco yàchì icúmí-tê ndañuhu-té ñuhìví.

⁷ Doco nsiùhù, palabra nchichí xi Dios nduá cáhàn-nsì.

Datnúù Espíritu Ìì sàxìntnùnì-ndà sàhà palabra nchichí xi Yua-nda Dios

Antes nìsa ìa dèhé palabra mà, cónisá cúndàà ini nèhivì. Doco cunaha-nsiá, dècuèndè na táyôo ñuhìví, dandu nì chitnùnì ini-yà ñà-ndohó sàà-ndà cundaà ini-ndà sàhà palabra mà, te ducán nìhìtáhvi-ndà sàà-ndà gloria xi-ya.

⁸ Doco tè-xídandacú ñuhìví yohó, cónì sàà-te cundaà inì-te palabra nchichí ìì mà, vàchi nú ni cúndàà ini-te ni cuí, mà cáhni-té Stoho ndiaha-nda nchìca cruz.

⁹ Doco cunaha-nsiá, dohó cachí nùù tutu ìì:

Cuàhà ñà-vàha sàni nsidayucun Dios ñà-nìhìtáhvi nècuàchì cuú inì-xi sàhà-yá. Doco ni-iin nèhivì, tàñáha ga cuninùù-né nansa iá mà; tàñáha ga cunitnùhu-ne sàhà ñà-nsiaha guá mà; ni-iin xichi cónì nìhnú ini-nè nansa coa.

¹⁰ (Pues mate ducán ndisa nduá), doco ndohó, sàni cundaà ini-ndà sàhà-ñá, sà-ináhá-ndá nansa iá, vàchi ducán sàni quida Espíritu Ìì xí-yá. Vàchi Espíritu Ìì, ináhá-yâ nsidanicuú iñàha; ndè ináhá stnâ-yà nsidanicuú ñà-nduá nacání ini Yua-nda Dios.

¹¹ Ni cachí-ndà iá iin nèhivì nacání inì-xi sàhà iñàha; pues còò inga nèhivì cundaà inì-xi sàhà ñà-nduá nìhnú ini nècuàchì mà, cuisì miinì-né

ináhá-nê. Te ducán iá stná Dios, còò inga ana ináhá ñà-nduá nacání ini-yà, cuisì-ní Espíritu Ìì xí-yá.

¹² Te ndohó, màdì iin espíritu xi ñuhiví yohó nduá nì níhì-ndà; còó. Divi Espíritu Ìì xí mii-yá nì nihítáhvi-ndà, te sàhá yùcán nduá vátùni mànihì ini-ndà ñà-ndiaha guá sàni nihítáhvi-ndà nùù-yá.

¹³ Te divi ñà-jaàn nduá datúi-nsi nùù nèhivì nihnú vaha ini xì Espíritu Ìì xí-yá. Doco màdì palabra nchichí xi nèhivì ñuhiví nduá cáhàn-nsi na datúi-nsi ñà-jaàn; còó, cuisì palabra chináhá Espíritu Ìì nduá cáhàn-nsi.

¹⁴ Doco nèhivì nihnú ini xì cuisì ñà-nduá cachí sàxìnítnùnì mii-né, mà cúí sàà-nè cundaà ini-nè sàhá chuun xi Espíritu Ìì xí Dios, vàchi nahi palabra loco nduá nùù-né. Ñàyùcànduá, mà cùì mànihì ini-nè, vàchi cuisì nú ni chíndéé Espíritu Ìì nèhivì, dandu vátùni sàà-nè mànihì ini-nè.

¹⁵ Doco iin nèhivì datnúù Espíritu Ìì anima-xi, mà úhì sàà-nè cundaà vaha ini-nè sàhá nsidaa iñàha. Doco nèhivì dava ga, mà cùì sàà-nè cundaà ini-nè nansa ndisa nihnú ini nèhivì xí Dios mà.

¹⁶ (Vàchi ducán cachí nùù tutu ìì:) “Còò ni-iin ana cùndáà ndisa inì-xi nansa nihnú ini Stoho-ndà Señor. Te ni còò stná ana chicá nchichí, te ducán cuàha-xi-yá conseju”, cachá. Doco cunaha-nsiá, divi nacua nihnú ini Cristu, ducán sàni nihítáhvi-ndà cunihnu stná ini-ndà vichi.

3

¹ Ducán iá, ñání; doco (na ní sa-ìe xì-nsiá daa), mànicúì dacuahá vahi mii-nsiá, vàchi tãñáha ga cunihnu vaha inì-nsia nacua cuní Espíritu Ìì xí Dios. Na nihnú ini ndéni nèhivì ní cui, ducán nihnú

inì-nsia, na ian nihnú iquin ini-nsià, có-sànìhì ví ini-nsià ichì Cristu.

² Na iin mée sáha-nda cuisì-ní tëndodo, te màdiá comida chicá fuerte, ducán nì quida stnái xì-nsiá, (puru palabra mà úhì cundaà ini-ndà nduá nì dâcuàhí mii-nsiá, màdiá palabra chicá nchichí), vâchi cónì sàà-nsià cundaà inì-nsia, te dècuèndè stnâ vichi, tâñáha ga sàà-nsià mànìhì váha inì-nsia.

³ Vâchi nihnú î inì-nsia nahi nsidaa nèhivì dava ga ñuhiví. Vâchi ñà-cúmbìdia inì-nsia, te nââ stnahá-nsiá, te táhndè dava-nsia, pues, ¿amádi divi ñà-jaàn nduú modo xíquida nèhivì ñuhiví? Te divi sàhà ñà-jaàn nâhà claru nihnú î inì-nsia nahi mii-né.

⁴ Vâchi dava-nsia, cachí-nsià nèhivì xí Pablo nduú-nsiá, te dava-nsia, cachí-nsià nèhivì xí Apolo nduú-nsiá. Doco ¿amádi divi ñà-jaàn nduá quidá stnâ nèhivì ñuhiví yohó?

Nsidaa-nda cutnáhá-ndá xinúcuáchí-ndá nùu Dios

⁵ Doco cunaha-nsiá, màdi nèhivì chicá ndiaá nduú Apolo, te ni màdi nèhivì chicá ndiaá nduú stnâ yùhù Pablo. Cuisì nèhivì xinúcuáchí nùu Dios nduú-nsí, te sàhà nsiùhù sàni xinindisá stnâ-nsià palabra ìi xí-yá. Ñâyùcànduá, cada iin iin-nda xi chuun nì nìhítâhvi-ndà nùu-yá.

⁶ Vâchi (ducán iá nahi chuun itu-ndà), iin-nda chihí, te inga-ndà cùhñù, doco Dios nduú ana dacuahnu-xi viu. Te ducani iá stnâ xì nsiùhù, primeru yùhù (nì cachitnùhi xì-nsiá palabra ìi). Daaní, después nì chindee stnâ Apolo. Doco cuisì sàhà Dios nì quee vìi (obra mà).

⁷ Màdiá chicá ndiaá ana nì càhàn xì palabra primeru, te ni màdiá chicá ndiaá stná ana nì chindee después, cuisì mii Dios nduú ana chicá ndiaá, te cuisì sàhà mii-yá nducuáhà palabra xi-ya.

⁸ Nècuàchì quidáchúûn primeru, xì stná nècuàchì nchícùn gà, iin-ni xíndiaa-nsì nùù-yá. Doco según chuun quidá iin iin-nda, ducán icúmí-ndá nihì-ndà tnùmanì xì-ndà nùù-yá.

⁹ Te vichi iin-ni xinúcuáchí nsidaa-nsí nùù-yá. Te mii-nsiá, na iin itu Dios (ndé quidáchúûn-nsí) nduú-nsiá. Te nahi stná iin vehe nì dándàcú-yá cuàha, ducán nduú stná-nsià.

¹⁰ Te yùhù, na iin albañil tùha vàha, ducán nduí, te nì quidachuín (chuun xi Dios ndé ndoó-nsiá). Na iin cimientu nduú (chuun primeru) nì quide jaàn sàhà gracia xi-ya. Te vichi sà-íá inga ana quida-xi chuun ma, na ian dacuahnú-né nama. Doco cuidadu ni cúndóó nsidaa nèhivì quidá seguir xì chuun nì dàquésáhî mà.

¹¹ Màsà cáchí-nè íá inga (palabra chicá ndiaá); còó. Cuisì ndiaá palabra sàhà Jesucristu (nì cacitnùhi xì-nsiá) primeru, vàchi nahi cimientu nduá.

¹² Te nú cuní iin nèhivì (quida-ne seguir xì obra mà), dandu queámà na ian cuàhàn-nè dacuahnú-né nama dìquì cimientu mà. Te nú cuàhàn-nè quida viì-né obra mà, dandu ducán queá na ian xichúûn-né oro, ò plata, ò yùù yéhè. Doco nú có-quidá vii-né obra mà, dandu ducán queá na ian xichúûn-né yutnù, ò mihì, ò ñùù.

¹³ Dandu después icúmí sàà iin quivì cundaà inì-xi nansa íá obra nì quida iin iin-nda. Vàchi na

sàa quivì mà icúmí coo nahi ñuhu xíxìn, te sàhà ñuhu mà cundaà inì-xi a natùì obra xi-nda nùù Dios, á coó.

¹⁴ Nú màsà cócò obra xi-nda, dandu icúmí-ndá nìhì-ndà ñà-vàha xi-nda nùù-yá.

¹⁵ Doco nú ni cocá, dandu mà níhì-ndà ñà-vàha cuàhàn-ndà nìhì-ndà nì cùí, doco anima-ndà, vátùni càcu viá, mate cundua mà na ian (nì chindee-nda mii-nda nùù) ñuhu xíxìn.

¹⁶ Mii-nsiá, ¿a có-nsìnúú inì-nsia ñà-ndùù-ndà na iin vehe ì ndé iá Dios? Vàchi iá Espíritu ì xí-yá ini anima-ndà.

¹⁷ Ñàyùcànduá, nú ni dándâñúhú iin nèhivì ñà-ì icúmí lugar xi-ya, dandu icúmí nècuàchì mà ndañuhu dahuun stná-nè quida-ya. Vàchi ndé iá-yà, yáha ga ì lugar mà, te cunaha-nsiá, divi nahi vehe ì-yá nduu-nda.

¹⁸ Màdí dandahví-nsià mii-nsiá, vàchi nú iá ana tuxí inì-xi nduú nècuàchì nchichí nùù nèhivì ñuhiví yohó, dandu xiñuhu dâma-ne, mate (cachí nèhivì) sàni culocó-nè, vàchi nú ducán, dandu ñà-sàni ndunchichí ndisa-ne cundua.

¹⁹ Vàchi ñà-nduá tuxí ini nèhivì nduú ñà-chicá nchichí, pues nùù Dios ñà-loco nduá. Te dohó cachí stná nùù tutu ì: “Icúmí Dios cundee-yá nùù tènchichí na meru xíquida cuahà-té maña dandáhví-te”.

²⁰ Daaní, inga xaan cachí stná tutu mà: “Ináhá Dios, ñà-chìcuéhè uun nduá chítnùní guâ ini nècuàchì nchichí”.

²¹ Ñàyùcànduá, màsà cútúxí ini ni-iin-nsia chicá ndiaá-nsià ñà-nchícùn-nsià iin tal nèhivì. Vàchi nsidanicuú nèhivì, xì nsidanicuú iñàha, divi cuenta xi mii-nsiá nduá.

²² A ducán yùhù Pablo, te ò Apolo, te ò Pedro, có-quidá, cuenta xi mii-nsiá nduú nsidaa-nsí. Dècuèndè stná ñuhiví yohó, cuenta xi stná-ndà nduájàn, te mate ni cútiácú-ndà, te ò ni sáa-ndà cui-ndà, có-quidá, vèchi nsidaa ñà-nduá cùu xì-ndà quivì vichi, ò quivì vèxi xi-nda, sàhà bien xi-nda nduá.

²³ Te Cristu nduú Stoho-ndà. Te Stoho mii-yá nduú (Yua-nda) Dios.

4

Nansa iá vida ni yàha nècuàchì apóstol ni ñihì chuun nùu Jesús

¹ Sàhà ñà-nduá sàni cachì jaàn xiñuhu ndanihi nèhivì nsiùhù ñà-nduú-nsí ana xinúcuáchí nùu Cristu; xiñuhu cundaà ini-nè ñà-ndàà nduá ni ñihì ndisa-nsi chuun ñà-dacuahá-nsí nèhivì palabra ì nìsa ìa dèhé sàhana.

² Te nú ducán nduá, dandu ndiá ìcà-nsí quida vii-nsí chuun ma, vèchi divi ducán nduá xiñuhu quida nsidaa ana dandacú nùu chuun xi inga nèhivì.

³ Doco yùhù, có-ndùlóquì nú cachí-nsià ñà-quidá vííí, ò á coó. Ni có-nàcání stná inì nú cachí dava ga nèhivì ñà-có-quidá vííí, te caná-né yùhù nùu iin juez. Ni yùhù, có-càchí stnài sàhà míí, a quidá vííí, á coó.

⁴ Te mate có-dàndòhó sàxìnítùnì míí, doco có-cùnì cachàmà ñà-còò falta xi, vèchi mii Stoho-ndà Señor icúmí cachi a ní quida viíí, á coó.

⁵ Ñàyùcànduá, màsà cuítñuhu-nda ñanìtnaha-nda, vèchi tàsàà quivì cundaà ndisa ini-ndà. Dècuèndè naxicocuín-yà, dandu natùu

claru nansa ndisa iá nsidaa chuun iá dèhé vichi. Dandu mii-yá datúi-ya nansa nihnú ini cada iin iin-nda, te cachi-yà xì-ndà ndé tantu sàni quida vii iin iin-nda.

⁶ Cunaha-nsiá, sàhà ñà-vàha xi-nsia sàni cachì xì-nsiá nsidaájàn sàhà Apolo xì yùhù, ñàni, áma mánihi ini-nsiá ñà-mà váha dayáha-nda ñà-nduá cachí tutu ì, vàchi mà váha ndenihi cahnu-nda iin (ana nchícùn-ndà), mientras inga-nè cahíchì ini-ndà; còó.

⁷ Vàchi iin-ni xínduu-nsia xì nsidanicuú gá nèhivì. Nsidaa ñà-nduá sàni nihítàhvì-nsiá, ñà-nduá nì dácútàhvì Dios mii-nsiá nduá. Te nú sàni cutahvì uun-nda iñàha, dandu mà váha cutuxi ini-ndà chicá ndiaá-ndà sàhámà, vàchi ñà-nì cutahvì uun-nda nduá.

⁸ Doco vichi nihnú inì-nsia na ian sàni ndu- cuica-nsiá. Sàni ndanchito ducún-nsiá na iin rey cahan-nsiá, te menos nì ndòo nsiùhù nùù-nsiá. A sácú vàha nú ni cúndúú ndisa-nsia ana chicá dandacú, dandu nsiùhù, sàà stná-nsì cutnahá-nsì xì-nsiá dandacu-nda.

⁹ Doco nsiùhù nècuàchì apóstol, sàni sàha Dios nsiùhù iin lugar chicá cahà-xí tuxí inì, na ian ni cúndúú-nsì nèhivì fuerza icúmí cui sàhà-ñá cun- dehè nèhivì (nansa ndohó-nsì. Doco cunaha-nsiá,) indéhe stná ángel mozo xi Dios.

¹⁰ Vàchi sàhà-ñá nchícùn-nsì Cristu, ndeníhì nèhivì nsiùhù nahi nècuàchì loco. Doco mii-nsiá, (mà loco-nsiá); nchichí gà-nsiá cahan-nsiá ñà-ndóó-nsiá ladu xi-ya. Nsiùhù, còò ni-iñàha níhìndèè-nsì cahan nèhivì; doco mii-nsiá, cuàhà gá poder xi-nsia iá (cahan-nsiá). Cahíchì stná ini nèhivì nsiùhù; doco mii-nsiá, iá tnùñuhu xì-nsiá nùù-né.

11 Nsiùhù, dècuèndè vichi xíhì-nsì doco, xíhì-nsì tècuíí, còò ñá-cundixi viì-nsí. Sahní cuií stná-nè nsiùhù, te xicánúú stná-nsì yoho yucán, vèchi còò ni-iin xaan ndé cundoo saín-nsí.

12 Ndee quidáchúûn-nsí, te nú cánàhá-nè xì-nsí, dandu vivìi-ni naxícóníhî-nsí nùù-né. Te nú quidá quíní-né xì-nsí, dandu quidándéé ini-nsí.

13 Te nú cáhàn quini-ne xì-nsí, dandu calma-ni sáha-nsinè ichì váha. Doco mii-né, ndeníhí-né nsiùhù nahi mihì chicuéhè, te ò ana chicá còò chuun-xi.

14 Pues, ¿índù chuun cachî xì-nsiá ducán? ¿A sáhà-ñá cuní cucahan núù-nsiá nduá? Còó, cuiisì sáhà ñà-nì sàà-nsiá cundaà vaha ini-nsiá, vèchi nahi dèhi nduú-nsiá, te màni-nsiá nùí.

15 Pues mate ni cúndóó ùxìn mil ana dacuahá nchichí xì-nsiá ichì Cristu, doco imindaa ana nduú ndisa nahi yua-nsiá, divi yùhù. Vèchi yùhù nì cachitnùhi xì-nsiá razón ndiaha sáhà Jesucristu, ñàyùcànduá divi nahi dèhi xínduu-nsia.

16 Sáhà ñà-jaàn sacúndáhvî nùù-nsiá ñà-iin-ni quida-nsia nacua quidá yùhù.

17 Ñà-jaàn nduá disáhà-xí sàni techuín Timoteo sàà-nè ndé ndoó-nsiá, vèchi mii-né, nchícùn viì-né Stoho-ndà Señor. Na iin dèhi nduú stná-nè, te màni gá-nè nùí. Pues divi icúmí càhàn xì-nsiá, te dansínúú ini-nè mii-nsiá nansa iá modo-xi nchícùn Cristu nacua nduá chináhì nèhivì nsidan-icúú lugar ndé natácá-nè cahvi-néyà.

18 Doco vichi, ináhî, ndee xícahàn dava-nsia, vèchi tuxí inì-nsia mà sái ndé ndoó-nsiá.

19 Doco yàchì icúmî sàl, nú cuní mii-yá, dandu cundaà inì sáhà nècuàchì càhàn ndee guá mà, a ndísá icúmí-nê ndudu ì, á coó.

20 Vàchi ley xi ñuhívì ìì xí Dios, màdì palabra uun nduá. Còó, poder xi mii-yá nduá icúmí stná.

21 Pues vichi cachi-nsià xì nansa cuní-nsià quide. ¿A cuní-nsià sàì, te càhàn ndeí xì-nsiá, te ò cuní-nsià sàì càhàn màní xì-nsiá, te cundoo vii-ndà?

5

Nansa nì cachi Pablo xiñuhu quida nèhivì ñuu Corinto xì iin tiàa cónì quidá víi xì iin nècuàchì ñahà

1 Cachi nèhivì nacání-né xì ñà-ìá iin-nsia nì là xi dihi (quín-xi). Cunaha-nsiá, cahnú cuàchi nduàjàn; dècuèndè nèhivì có-ìnáhá sàhà Dios, ni có-quidá-né ducán.

2 Doco mii-nsiá, (ndahví-nsià), vàchi tuxí vá ini-nsià ndiaha gá-nsià. Doco ndiá icà-nsiá màcúndoo-nsia tnùnsí ini, te tavà cuàán-nsiá tiàa nì quida ducán ñà-màsà cóó gá-nè nùù-nsiá.

3 Te yùhù, mate xica ié`, doco na ian jaàn iá anímè cutnáhì xì-nsiá, ducán nduá; te sàni nacani inì sàhà chuun jaàn, ñàyùcàndùá, cuàhìn cachi xì-nsiá nansa quida-nsia xì nècuàchì nì quida xi cuàchi ma.

4-5 Xiñuhu nataca nsidaa-nsiá, te coo stná ndudu ìì xí Stoho-ndà Jesucristu, te na ian coo stná anímè xì-nsiá cundua. Dandu ndacùçahan-nsiá quivì-yá, te cachi-nsià xì nècuàchìmà ñà-ìcúmí-ndá nacoo-ndané nùù ndahà ñà-malu, te ducán nihì iquicúñú-nè iin castigu sàhà-ñá después càcu anima-nè quivì (màcuíta-nda nùù) Stoho-ndà Jesús.

Ejemplu nì sanduu vicò pascua sànahà na nisa cuxio nsihi pan nihí levadura nsidátáchí xân

⁶ Mii-nsiá, tuxí ini-nsià ñà-vìi gá xíquida-nsia vichi, doco cóo, có-íá vìi ñà-ndùá quidá-nsiá. ¿A có-ínáhá-nsiá dichu cachí: “Mate iyuhu-ní tàtnà nsidátáchí xí pan quée, doco cuàhà gá ndutáchâ”? (Te ducán íá stná xì falta, mate iyuhu-ní-ñá ni cóo, doco xítìà inicutu.)

⁷ Ñàyùcàndùá, (xiñuhu cuxio nsidaa ñà-quini ñisa la antes, dandu nanduu-nda nèhivì sàà xí Dios, cunduu-nda nahi) yusàn pan cóni quée ni-iyuhu ñà-nsidátáchí xân. Vàchi mii-yá, sàndèníhí-yàndó nduu-nda nèhivì sàà cóo falta-xi ñà-sàni xìhì Cristu cuenta xi-nda. Te ducán queámà na ian quidá-né vicò pascua (na xìhì lelù nduú promesa), vàchi Cristu nduú nahi promesa xi-nda.

⁸ Te vicò pascua mà, puru pan có-ndutáchí xixí-né. (Te ejemplu nduámà.) Ñàyùcàndùá ndohó, puru ñà-nduú ñà-ndáà cuisì ní cúncícùn-ndà. Màsà dátíiâ uun-nda quida-nda ñà-íá vàha, vàchi queámà na ian có-chívàha vìi-ndà vicò mà; te màsà cúníhnú chicuéhè stná ini-ndà, te ni màsà quidá-ndá ni-iin ñà-íá quini, vàchi nú ducán, dandu queámà na ian có-chívàha vìi-ndà vicò, te na ian cóni cúxíó nsihì tàtnà nsidátáchí xí pan mà.

⁹ Nùù inga tutu nì tiai antes nì cachì xì-nsiá ñà-màsà cútnáhá-ndá xí nèhivì tùha càhàn xì ana cóni nándàhà xì-né.

¹⁰ Ducán nì tiai nùù-nsiá, doco có-cùní cachàmà ñà-nacoo-nsia nsidanicuú nèhivì xíquida ducán ñuhiví yohó, vàchi cuisì inga ñuhiví cunduu lugar ndé mà cútnáhâ gá-ndà xì nècuàchìmà, vàchi ñuhiví yohó ndoó cuáhà ana có-quidá víi: xího-né cucumi-né cuàhà ñà-cuicà, o xidácuíhná-nê, te ò xicàn tàhvi-né nùù ñá-cô-nduú Dios.

11 Doco ñà-nduá nì cachì nùu carta mà nduá yohó: nú nècuàchì có-quidá víi ma nduú iin ñani-ndà (iin-ni cahvi xì mii-yá), dandu màsà cútnáhâ gá-ndà xì-né nú iá cuàchi-ne sàhà nècuàchì ñahà, te ò túha-ne xihò-né ñà-ìcúmí ñanìtnaha-ne, te ò cahvi-né iin ñà-có-nduú Dios, te ò túha-ne canàhá-nè, te ò túha-ne xini-ne, te ò xidácuíhná-nè, dandu màsà cútnáhâ gá-ndà xì-né. Ni nácóo dahuun-ndané; ni màsà cuáhandee ini-ndà cuxi-nda xi-né.

12-13 Cunaha-nsiá, có-quidá tocar yùhù nsidan-dàì sàhà cuàchi nèhivì có-nchìcùn ichì mii-yá. Mii-yá quida xi ñà-jaàn. Doco mii-nsiá, fuerza icúmí-nsiâ cachi-nsiâ nansa cuu xi nèhivì cutnáhâ xí-nsiâ nú ni sàà-nè quida-ne cuàchi. Ñàyùcànduá, dohó cachí xì-nsiá: ni cúxíó dahuun tiàa iá falta-xi ma nùu-nsiá.

6

Màsà cúhùn-ndà nùu juez, te canicuàchi stnaha-nda sàhà-ndà, cachí Pablo

1 Có-ndiá ìcà-nsiá canicuàchi stnahá-nsiá sàhà-nsiá nùu iin juez có-xiníndísá-xí ichì Dios. Chicá vaha nùu nèhivì xí mii-yá ni ndúndáà sàhà chuun xi-nsia.

2 Amádi sá-ínáhá-nsiâ ñà-divi ndohó nèhivì xí-yá cunduu ana (chindee) nsidandaà-xì sàhà nèhivì ñuhivì yohó quivì juicio. Pues nú ducán nduá, dandu ádi vátùnì sàà-ndà nsidandaà-ndà sàhà chuun cuatiluha cuú ofrecer tiempo vichi.

3 Cunaha-nsiá, dècuèndè stná ángel icúmí-ndá nsidandaà-ndà sàhà-xí. Pues nú ducán, dandu ádi mà úhì nsidandaà stná-ndà sàhà chuun sencillu iá ñuhivì yohó-ní.

4 Ñàyùcàndùá, nú iá iin pleitu xi-nsia, dandu xiñuhu nacàxin-nsia nèhivì tuxí inì-nsia chicá mà nchìchí, te mii-né nsidandaà sàhájàn.

5 Pues, ñà-jaàn cachí uin xi-nsiá áma cúcáhán nùù-nsiá sàhájàn. ¿A ndísá còò ni-iin ñani-ndà nchichí mahi-nsiá? ¿A ndísá còò iin cui nsidandaà sàhà chuun xi iin-nsia inga-nsiá?

6 Doco (ndahví-nsià), vàchi sáhàn-nsià sanícuàchi stnahá-nsiá sàhà-nsiá, mate iin-ni ñaní xínduu-nda. Dècuèndè nùù iin juez có-xiníndísâ (xí Jesús) sáhàn-nsià.

7 Ñàyùcàndùá, iin falta cahnú xí-nsiá nduájàn, vàchi có-ndiá icà-ndà canícuàchi stnaha-nda sàhà-ndà. Chicá vaha ni cuáha-nda quidaquini-ne xi-ndà, te quidandee ini-ndà. Chicá vaha nacoo-ndané cahnìndàhvì-nèndó.

8 Doco mii-nsiá, có-quadándéé stnahá ini-nsià sàhà-nsiá. Còó. Dècuèndè quidaquíni-nsiá xì ñanìtnaha-nsia, te xidándiáá-nsià ñà-nduá icúmí-nê, mate iin-ni ñaní xínduu nsidaa-nda.

9 Sà-ìnáhá-nsiâ ñà-mà níhì nèhivì malu sàà-nè ñuhivì ìì xí Dios. Ñàyùcàndùá, màsà dándáhvì ni-iin nèhivì mii-nsiá, vàchi mà cúndiátû anima ni-iin nèhivì nchícùn xì ñahà, ni-iin stná nèhivì cahví xì yuù ò figura, ni-iin stná nèhivì iá xì inga ana có-nduú nècuàchì vehe-ne, ni-iin stná nèhivì nduú ùì nèhivì,

10 ni-iin tèculhà, ni-iin stná ana tùha xího xì ñà-ìcúmí inga nèhivì, ni-iin stná tè-xíni, ni-iin stná tè-tùha canàhá, ni-iin stná tè-sahníndáhvì xì ñanìtnaha xi. Ni-iin nècuàchì jaàn mà níhìtáhvì xì ñuhivì ìì xí Dios.

11 Te mii-nsiá, divi ducán nìsa quida dava-nsia antes. Doco sàni ndoo cuàchi-nsiamà, te sàni

ndu-ìì stná anima-nsiá. Ñàyùcàndùá, nèhivì vàha sanduú-nsiá nùù mii-yá vichi. Ducán nì cuu xi-nsiá na ní (xinindisá-nsiá palabra ìì, te nì) ndacùcahan-nsiá quivì Stoho-ndà Jesucristu, vàchi nì chindee stná Espíritu Ìì xí Yua-nda Dios.

Nsidaa-nda xiñuhu quidañuhu-nda cuerpu xi-nda; màsà quídá ndevàha-nda xi mii-nda

¹² (Cachí nèhivì:) “Vàtùni quida-nda ñà-nduá cudí ini-ndà”. Pues vihini, doco màdì nsidaa iñàha nduá iin ñà-chìndéé xí-ndá. Mate vihini quida-nda ñà-nduá cuní-ndà, doco màsà cuáha-nda cundee ni-iin ñà-có-íá vàha nùù sàxínítnùní-ndà.

¹³ Vachi dohó cachí stná iin dichu: “Tìxi-nda nduú fin xi ñà-nduá xixi-nda, te chuun quídá tìxi-nda nduú stná ñà-cuñuhamá”. Doco cunaha-nsiá, iin-ni fin icúmí ndúùàjàn, vàchi vaxi iin quivì icúmí Dios dandáñúhú-yâ nsidaájàn. Te cuerpu xi-nda, ¿índù chuun icúmíá? Pues màdì-ñá coo-nda xi ndéni ñahà ní cui; còó. Divi ñà-cunucuachi víi-nda nùù Stoho-ndà Señor nduú chuun xan. Te cunaha-nsiá, íá stná-yà sàhà-ndà.

¹⁴ Ñàyùcàndùá, nacua nì natiacu-yà nì quida Yuamáni-yá Dios, divi ducán stná ndohó, icúmí-ndá natiacu stná-ndà quida ndudu ìì xí-yá.

¹⁵ ¿A có-nsínúú inì-nsia ñà-ndahàsáhà Cristu nduu-nda? Te nú ducán, ¿a íá vàha coo stná-ndà xì iin ñahà ndevàha, nú nahi ndahàsáhà-yá sàndùù-ndà? Còó, màsà nunca quida-nda ducán.

¹⁶ ¿A có-nsínuu stná inì-nsia nansa íá xì iin tiàa nì quida iin cuàchi xì iin ñahà ndevàha, ñà-iin-ni nèhivì sàni nanduu-ne? Vàchi ducán cachí tutu

ìi: “iin-ni nèhivì cunduu ndúi-nè, (nècuàchì tiàa xi nècuàchì ñahà)”.

¹⁷ Doco nú sàni yàha-nda ndahà Stoho-ndà Señor, dandu iin-ni anima sàni nanduu-nda xi mii-yá.

¹⁸ Ñàyùcàndùá, nacoo dahuun-nsia cuàchi ñà-càhàn-ndà xì inga ana cóni nándàhà xì-ndà. Nsidaa cuàchi dava ga, có-quidá quíni guà` xì iquicúñú-ndà. Doco nú ni quida-nda iin falta xì iin nècuàchì ñahà, dandu ñà-sàni quida-nda cuàchi nùù cuerpu xi mii-nda nduájàn.

¹⁹ ¿A có-ínahá-nsiâ ñà-vehe Espíritu ìi xí-yá nduú cuerpu xi-nda, vèchi sàni nihítáhvi-ndà Yà-ìi mà nùù-yá? Ñàyùcàndùá, màdiá mii-nda nduu-nda stoho-ndà;

²⁰ còó. Mii-yá, sàni xiin-yàndó na ní dànáà-yá sàhà-ndà, te sàhámà nsidaa ñà-ndùá quidà-ndà na itiácú-ndà xì cuerpu xi-nda, divi sàhà tnùñuhu xí mii-yá ni cúndúá.

7

Nansa xiñuhu quida-nda xi nècuàchì vehe-nda

¹ Vichi cuàhìn càhìn xì-nsiá sàhà ñà-ndùá nì tiàa-nsia nùí. Cunaha-nsiá, cuaha-ni iá nú iá mii iin tiàa, te có-íá-nè xì ni-iin nècuàchì ñahà.

² Doco còtó quida nècuàchì mà iin cuàchi, chicá vaha ni nándàhà-né; te ducání stná nècuàchì ñahà, chicá vaha ni cúcúmí-nê ìi-né.

³ Te cada iin iin tiàa sàni nandàhà, ndiá ìcà-né quida ndisa-ne cumplir chuun nì nihì-né ñà-coo-ne xì ñahàdihí-nè. Stná nècuàchì ñahà, ndiá ìcà stná-nè quida viì-né cumplir nacua nduú chuun xi-ne ñà-coo stná-nè xì ìi-né.

4 Màdì micuísì nècuàchì ñahà nduú ana cachi nansa quida-ne, a coo-ne xì ì-né, á coó. Icúmí cachi stná nècuàchì tiàa. Te ducání stná nècuàchì tiàa ma, màdì cuisì mii-né cachi stná-nè nansa quida-ne xì ñahàdihí-nè, vàchi icúmí cachi stná nècuàchì ñahà.

5 Màsà cáchí-nsià “còó” nùù nècuàchì vehe-nsia. Cuisì nú vihini cuní-nsià cunihii-nsiá iin ùi quìvì sàhà-ñá càcàn tàhvì-nsiá nùù Dios. Dandu después nacuastnahá-nsiá, vàchi nú coó, vihini dacà ñà-malu Satanás sàxìnítnùnì-nsià ñà-có-cùndéé gâ ini-nsià cunihii-nsiá.

6 Nsidaa ñà-jaàn cachí xì-nsiá, doco màdì ñà-dàndàcuí nùù-nsiá nduá; còó. Cuisì cachí xì-nsiá ducán sàhà-ñá cundaà ini-nsià nansa iá iin ñà-vàha cui quida-nsia.

7 Vàchi yùhù, cudìi inì nú ni quidá nsidaa nèhivì nacua quidé, (ñà-có-ié` xì ni-iin nècuàchì ñahà). Doco cada iin iin-nda según nansa nì nihítàhvì-ndà nùù Dios, vàchi tucu tucu sáhatahvì-yá iin iin-nda.

8 Ñàyùcàndùá, yùhù cachí xì nsidaa nècuàchì ñahà cuaán, xì nsidaa stná nècuàchì tàñáha ga nandàhà, ndiaha gá coo xi-né nú ni quidá-né nahi yùhù (ñà-cónì nándàhí).

9 Doco nú mà cùndéé ini-nè cunihii-né ducán, dandu ni nándàhà-né chicá vàha, te màsà càcánúú-né xího stnahá uun-ne.

10 Doco nèhivì sàni nandàhà, iá ndisa ñà-nduá dandacuí nùù-né. Te màdì cuísì yùhù cachí xì-né palabra yohó; vàchi ducán dandacú stná Stoho-ndà Señor. Te dohó cachí-yà: ni-iin nècuàchì ñahà màsà nácóó-né ì-né.

11 Doco nú sàni naco-ne nècuàchìmà, dandu (màsà nándàhà gá-nè xì inga tiàa). Iin-ni

ni coó mii-né, te nú coó, ni náxícócuîn-nè nacuaastnahá-né xì ì-né. Daaní, divi ducání xí stná nècuàchì tiàa, màsà cátéstnahá stná-nè xì ñahàdìhí-nè.

¹² Daaní, mii-nsiá nècuàchì dava ga tu, cui sì cuàhìn cachì xì-nsiá ñà-ndùá nacání uun inì, vèchi có-ndùá iin ley dandacú Dios. Nú iá iin ñani-ndà có-xiníndísâ ñahàdìhí-xi, màsà cáté-nè nècuàchìmà nú cudí ini nècuàchìmà coo ndisa-ne xì ì-némà.

¹³ Te ducání stná xì nècuàchì ñahà: màte có-xiníndísâ ì-né, doco chicá vaha màsà cáté stná-nè ì-né, nú cudí ini nècuàchìmà coo ndisa-ne xì ñahàdìhí-némà.

¹⁴ Vèchi mate cuí sì nècuàchì ñahà xiníndísâ, doco sàhájàn chicá mà ùhì cundiatú stná ì-né nù Dios; te ducání stná nècuàchì ñahà có-xiníndísâ, nú nècuàchì xiníndísâ nduú ì-né. Doco nú ndúì-nè có-xiníndísâ-né, dandu ùhì iá cundiatú mée xi-ne. Doco nú xiníndísâ-né, (mate imindaa-né), dandu mée ì ndisa cunduu-ve.

¹⁵ Doco cunaha-nsiá, nú cuní nècuàchì có-xiníndísá-má quecuaán-né, dandu mà cútnúú-nî, pues ni cùhùn-nè. Te nú sàcuàhàn-nè, dandu libre iá nècuàchì xiníndísâ nì ndòo, ò sea nècuàchì tiàa ò nècuàchì ñahà ni cundúú-né. Doco ¿índù ñà-chicá cuní Dios quida-nda? Divi ñà-cundoo manì-ndà.

¹⁶ Vèchi iin nècuàchì ñahà, có-ínahá-né ñà-vihini sàhà mii-né sàà nècuàchì vehe-ne càcu stná an-ima-nè. Te có-ínahá stná iin nècuàchì tiàa, pues vihini sàhà mii-né sàà stná ñahàdìhí-nè càcu-ne.

Màsà nácání ini-ndà nansa ndenihì nèhivì ñuhiví yohó ndohó

¹⁷ Nacua nduú modo nì chitnùnì ini Dios cundoo-nda ñuhiví, ducán xiñuhu cundoo cuéyàà-ndà.

Nacua iá-ndà na ní quìhi-nda ichì-yá, ducán xiñuhu quida-nda seguir. Divi palabra jaàn nduá cachî xî nsidaa nèhivì cahvi xi-yá.

¹⁸ Vàchi nú sà-ìtúú seña xi Dios ìcà-ndà na ní quìhi-nda ichì-yá, dandu màsà nándúcú-ndá nansa ndutu ñà-jaàn. Te ducání stná, nú còò seña mà ìcà-ndà na ní quìhi-nda ichì-yá, dandu màsà nándúcú-ndá nansa màcùtua ìcà-ndà.

¹⁹ Vàchi seña mà, nú itúá, ò nú có-ìtúá, còò ni-iñàha cuní cachàmà. Doco ñà-chivàha-nda ñà-nduá dandacú-yá, ñà-jaàn ndisa nduú ñà-ndiáá.

²⁰ Doco nacua nì sandoo iin iin-nda na ní quìhi-nda ichì-yá, divi ducán ni cúndóó ìi-ndà.

²¹ Dava-nsia, có-ndòó-nsiá libre, fuerza quidáchúûn-nsiá nùù lamú xi-nsia, te ducán nìsa ìa stná quivì nì quìhi-nsia ichì-yá. Doco màsà nácání ini-nsià sàhájàn; còó. Doco nú iá nansa cui caquee-nsia libre, dandu chicá vaha ni quidá stná-nsià aprovechar.

²² Cunaha-nsiá, mate fuerza quidáchúún-ndá quidá inga nèhivì, doco nú ichì Stoho-ndà Cristu nduá nchícùn-ndà, dandu libre iá-ndà nùù mii-yá. Te divi ducán stná, nú nèhivì xicánúú libre nduu-nda vichi, dandu iá stná ana xinúcuáchí-ndá nùù-xí, divi mii-yá.

²³ Te sàni dànàà-yá sàhà-ndá. Ñàyùcànduá, màsà cuáha-nda quida-nda chuun nì dàndácú ana nduú nèhivì ùún.

²⁴ (Pues sàhà nsidaájàn yùhù cachî xî-nsiá) ñà-nacua ndoo-nda antes na táñàha ga quìhi-nda ichì-yá, divi ducán ni cúndóó ìi stná-ndà vichi, ñàni.

²⁵ Vichi cuàhìn càhìn sàhà ñahà cuàchì tàñáha ga nandàhà. Còò ni-iñàha ni cachí Stoho-ndà Señor xí sàhà nècuàchìmà, doco sàhà gracia xi-ya, vətùni cahvi-nsia xí conseju sáhi mii-nsiá. Pues sàhámà cuàhìn cachì ñà-ndúá nihnú uun inì:

²⁶ chicá vaha iin-ni ni cúnódóo-ndá nacua ndoo-nda vichi cahan yúhù, vàchi tiempu ùhì nduá yichi.

²⁷ Ñàyücànduá, nú iá ñahàdìhí-ndà, dandu màsà càtéstnàhà-ndà. Te nú còò ñahadihí-ndà, dandu chicá vaha màsà nándúcú-ndá nansa nandàhà-ndà.

²⁸ Doco nú ni nándàhà iin tiàa, màdì cuáchi nduá. Te ò nú ni nándàhà iin ñahà chii, màdì cuáchi nduú stná. Cuisiá mà mánì tnùndoho yàha-ne, te yùhù, có-cùnî ndoho guá-nsià.

²⁹ Cunaha-nsiá, mà vaxi ga cuàhà tiempu, ñàni. Ñàyücànduá, nú iá ñahàdìhí-ndà, màsà cúníhnú ini-ndà nduámà iin chuun chicá cahnú.

³⁰ Te nú sacu-nda (sàhà iin tnùndoho), màsà ndúlócô gà-ndà sàhájàn. Te nú cudì ini-ndà sàhà iñàha, màsà cútúxí ini-ndà chuun chicá ndiaá nduá. Te nú sàni xiin-nda iin traste, màsà cúníhnú ini-ndà yàha ga xiñuhá nùù-ndà.

³¹ Te nú icúmí-ndá cuàhà chuun ñuhiví yohó, màsà ndúlócô cuàhà-ndà sàhájàn, vàchi ñuhiví yohó, icúmîà ndañuhá.

³² Yùhù, có-cùnî nacani cuahà inì-nsia sàhà ni-iñàha. Iin nèhivì còò nècuàchì vehe-xi, (mà úhì) nihnú ini-nè sàhà chuun xi Stoho-ndà Señor nansa quida-ne, te cudì ini-yà.

³³ Doco iin nècuàchì iá ñahàdìhí-xi, chicá nacání ini-nè sàhà chuun xi ñuhiví yohó, vàchi nandúcú-nè nansa cudì ini ñahàdìhí-nè.

34 Daaní, iin nècuàchì ñahà sàni nandàhà, tucu quidá stná-nè nùu iin nècuàchì còò íi-xí. Nècuàchì còò íi-xí, (mà úhì) nihnú ini-nè chuun xi Stoho-ndà Señor, vàchi cuní-nè cundiaa-nè mii-né, te coo ndoo anima-nè, dandu cunduu-ne iin nèhivì îí xí-yá. Doco iin nècuàchì íá ìi-xí, chicá nihnú ini-nè chuun xi ñuhiví yohó, vàchi nacání ini-nè sàhà nècuàchì vehe-ne.

35 Pues, nsidaa ñà-jaàn cachí xì-nsiá sàhà ñà-cunduu ñà-vàha xi-nsia, màdì sáhà-ñá cadì nùu-nsiá iin modo có-ndiá ìqué. Cuisì cuní quida-nsia ñà-íá vii, te nihi-nsiá cunucuachi víi-nsiá nùu Stoho-ndà Señor, màdiá coo iin ñà-mà cùu chivàha-nsia.

36 Pues ni cachí-ndà íá iin tiàa yáha ga cuní nandàhà xì ana cudíi inì-te, te có-quidá víi-té ñà-íá miá cahan-té. Pues nú ducán nduá xiñuhu coo, dandu vátùni quida-tè nacua nihnú inì-te, divi ñà-nandàhà-té xí-ñà, màdì cuáchi cundua.

37 Doco nú iin-ni sàni nacani vaha inì-te, te còò necesidad nandàhà-té, vátùni quidandee inì-te, cachí-te, dandu ñà-jaàn quidá víi-té. Iin-ni sàni nacani inì-te ñà-mà nándàhà-té, te amiga xi-te mà, señorita quida ìi-ñá seguir cunduu-ñà.

38 Ñàyùcàndùá, (ndúìàjàn, vátùni íá): nú ni nándàhà-té xí-ñà, vátùni íá ñà-nduá quidá-te; te nú ni cachí-te mà nándàhà-té, vátùni quidá stná-te, doco chicá nsiha nduájàn nùu inga mà.

39 Iin nècuàchì ñahà sàni nandàhà, iin-ni icúmí-né coo-ne xì ìi-né ndè cachi sàa cui nècuàchìmà. Doco nú sàni xihì nècuàchìmà, dandu libre íá-nè nandàhà-né xì inga tiàa cudíi ini-nè, cuisì-ní ni cúndúú stná inga tiàa ma iin nèhivì xí Stoho-ndà Señor.

⁴⁰ Doco nú ni cachí-nè mà nándàhà gá-nè, dandu chicá ndiaha quea, tuxí ini yùhù. Te yùhù quidé cuenta chindéé stná Espíritu Ìì xí Dios sàxìnìtnùnî.

8

Màsà cáxi-nda ò cuxi-nda ñà-nduá chindóó nêhivì nùù ñà-nduá cahvi-né

¹ Vichi cuàhìn càhìn sàhà nansa quida-nda xi ñà-nduú ofrenda chindóó nêhivì nùù ñà-càhvì-né. Pues vihini cachí-ndà: “Nsidaa-nda ináhá vâha-nda (sàhà chuun jaàn)”. Doco nú ducán cachí-ndà ñà-ináhá cuâhà-ndà iñàha, dandu queámà na ian ndiaá gá-ndà tuxí ini-ndà. Doco nú cuú ndisa ini-ndà sàhà ñanìtnaha-nda, dandísá sàà-ndà cunduu-nda nêhivì ndiaá ndisa.

² Te nú tuxí ini-ndà ináhá cuâhà-ndà, dandu cumánì gá ñà-cundaà vâha ini-ndà nacua ndiá ìcà-ndà.

³ Doco nú cuú ini-ndà sàhà Dios, dandu mii-yá, ináhá ndisa stná-yà ndohó.

⁴ Ñàyùcànduá, ñà-yòhó nduá cachí sàhà ofrenda chindóó nêhivì nùù ñà-càhvì-né. Ináhá-ndá ñà-imindaa Dios iá, te còò ni-iñàha ndiaá figura iá ñuhiví yohó,

⁵ mate cuâhà gá ñà-nduá cachí nêhivì nduú ana cahvi-né ansivi ò ñuhiví, vâchi cuâhà iñàha cachí-nè nduú dios xi-ne ò stoho-nè.

⁶ Doco nùù ndohó, imindaa Yua-nda Dios iá. Cuisì mii-yá nì quidavâha xi nsidaa iñàha, te xinúcuâchí-ndá nùù-yá. Te imindaa stná Stoho-ndà Jesucristu cahvi-nda, vâchi sàhà ndudu ìì xí-yá nì sàcòò nsidaa ñà-ìá, dècuèndè stná ndohó.

⁷ Doco màdì nsidaa nêhivì sánhì vâha ini-nè sàhájàn. Vâchi dava nècuàchì xiníndísâ, quidá

îi-né cuenta ñà-dàcútiácú ndisa xi figura mà nduú ofrenda chindóó nèhivì nùá, vèchi antes ducán nìsa quida stná-nè. Ñàyùcàndùá, na xixí-né ofrenda mà vichi, nihnú ini-nè ñà-sàni cumanchá anima-nè nduá, vèchi tàñáha ga cutùha vaha-ne nacuni-nè sàhámà.

⁸ Pues, nàhà claru màdì xì ñà-ìtiácú-ndà icúmí-ndá ndee vaha-nda nùù Dios, vèchi nú sàni saxì-ndà iñàha, màdiá chicá ndiaá-ndà, te ò nú có-cùnì-ndà caxì-ndà iñàha, iin-ni iá stná-ndà, (còni xidá cuàchi-nda.)

⁹ Doco cuidadu ni cúndóó-ndá, vèchi mate iá derechu xi-nda (caxì-ndà ñà-yúcán), doco vihini coo iin nèhivì có-cùndàà inì-xi sàhámà, te vihini sàhà ndohó cuida cuàchi-ne.

¹⁰ ¿Índù modo? Pues, ni cachí-ndà sàni xini iin nèhivì mii-nsiá nècuàchì ináhá guâ, te nì quìhvi-nsia vehe ndé itá ñà-ndùá cahvi nèhivì, te ndoó-nsiá vehe ma, xixí-nsiá ofrenda xi-ñamà. Te nèhivì nì xini xì-nsiá mà, nú ni cúndúú-né iin nècuàchì có-cùndàà vaha inì-xi, vihini cuàhandee stná ini-nè caxì stná-nè ñà-jaàn.

¹¹ Ñàyùcàndùá, sàhà-ñá tuxí mii-nsiá ináhá guâ-nsiá (nansa quidá-nsiá), vihini dandáñhú-nsiâ anima ñanìtnaha-nsia, mate sàhà stná mii-né nì xihì Cristu.

¹² Ñàyùcàndùá, có-queé víámà, vèchi nú ni quida-nda cuàchi nùù ñanìtnaha-nda ducán, dandu nùù stná Cristu nì quida stná-ndà cuàchi queámà, vèchi sàni dàtúcù-ndà sàxìnítnùnì nècuàchì mà ñà-có-sàà-nè cundaà vaha ini-nè.

¹³ Ñàyùcàndùá, yùhù, nú cuàhàn iin ñanìtnahi quida-ne iin cuàchi sàhà ñà-ndùá cunì caxì nì cùì, dandu chicá vaha màsà nunca caxì gué` ni-iin cuñu

mà, còtó cuida cuàchi iin ñanìtnahi.

9

Nansa nì cachi Pablo xì nèhivì xítñùhu xi-né ñà-quidáchúûn-né nahi dava ga nèhivì

¹ Yùhù, ¿amádi libre ié? ¿Amádi iin nècuàchì apóstol nduú stnáì? Dècuèndè mii Stoho-ndà Jesús sàni xinìnùù stnáì. Te mii-nsiá, ináhá stná-nsià nì quide chuun ndiaha xí-yá ndé ndoó-nsiá, te nì xinindisá-nsiá mii-yá.

² Vihini có-nàcúní dava nèhivì yùhù ñà-nduú ndise iin apóstol, doco mii-nsiá, ináhá vâha-nsia, vâchi ñà-sàhà yùhù sà-xíníndísâ-nsiá ichì-yá, divi sàhámà cundáà vâha ini-ndà ñà-nùù mii-yá sàni nìhìtâhvì' chuun quidé.

³ Vichi cuàhìn cachì iñàha xi-nsiá, vâchi ndoó dava nèhivì xítñùhu xí.

⁴ Pues, ¿amádi iá stná derechu xi-nsi (cahvi-nsi xì-nsiá) ñà-dacuxí-nsiá nsiùhù?

⁵ Te amádi iá stná derechu xi-nsi nandàhà-nsí, te cundaca-nsi iin ñahàdìhí-nsì nacua quidá stná ñani Stoho-ndà Señor, xì stná Pedro, xì stná dava ga nècuàchì apóstol.

⁶ Vihini tuxí ini-nsià ñà-cuisì Bernabé xì yùhù xínduu nèhivì còò derechu-xi; doco iá stná derechu xi-nsi nacoo-nsi chuun xì ñuhìví yohó, te quida-nsi cuisì chuun ì.

⁷ Vâchi ducán iá xì-nsí na ian quidá soldadu, màdì cuenta xi mii-té sâhàn-te guerra. (Còó.) Daaní, nacua quidá stná tè-ndiàà xì yutnù quisì vídì, saxí stná-te iin ùi-si; te ò nú quisì ndacá-te, iá stná derechu xi-tè cuhni-tè tèndodo-sí coho-tè.

⁸ Te mãsà cútúxí stná ini-nsia ñà-sàhà-ñà có-nduú mii-yá, ñàyùcànduá, có-ndiàá palabra

cachî jaàn. Còó, vâchi divi ducán cachí stná ley ì ndé nì tìaa Moisés

⁹ nùù tutu ì, te nì cachi Dios: “Màsà cúñúhú ñunù yuhù buey na sánihni-sì trigu cóya”. Pues, náhà claru, màdi sáhà-ñá màni guá quisì mà nùù-yá nduá disáhà-xí nì câchí-yà ducán.

¹⁰ Còó, sàhà ndohó nì cachi-yà ducán, (vâchi ejemplu) nduá, te cuní cachàmà ñà-ndiá ìcà coo tnùndé ini xi nècuàchì (chináhá palabra ì) ñà-nìhì-né iin algu, divi nacua iá stná xì iin nècuàchì xitú, te ò iin peón dacóyo nùnì, nihnú ini-nè nìhì stná-nè iyuhá.

¹¹ Te nsiùhù, nú sàni cachitnùhu-nsi xì-nsiá meru palabra cutiacu ndiaha anima-nsià, dandu amádi iyuhu nduá nú ni cuáha-nsià nsiùhù iyuhu ñà-cutiacu-nsi ñuhìví yohó.

¹² Te nú ndoó nèhivì dava ga iá derechu-xi càcàn-nè ñà-jaàn nùù-nsiá, dandu ¿amádi chicá iá stná derechu xì nsiùhù sàhà ñà-jaàn?

Doco còó; có-xìcàn-nsi ni-iñàha nùù-nsiá, mate iá ndisa derechu xi-nsi. Cuisì quidándéé ini-nsi, còtó nú ni càcàn-nsi iñàha cadìàmà nùù nèhivì, te mà cúníndísâ gá-nè razón ndiaha xí Cristu.

¹³ Ádi sá-ínáhá stnâ-nsià nansa xíquida dùtù quida-xi chuun ì veheñùhu (xi nècuàchì raza Judea), xixí-né promesa sàà yucán. Vâchi dùtù xinúcuáchí nùù mesa ì ndé xìxìn quisì nduú promesa, níhì-né iyuhu cuñu mà.

¹⁴ Ñàyùcànduá, náhà claru sàni chitnùnì ini Stoho-ndà Señor ñà-ducán quida stná nèhivì cachitnùhu razón ndiaha, divi sàhà chuun quidá-némà icúmí-nê nìhì stná-nè ñà-cutiacu-nè.

15 Doco yùhù, cóni xíquèn ñà-jaàn nùù-nsiá, mate iá derechu xi. Ni màsà cútúxí stná inì-nsia a tiaí carta yohó ñà-quidé reclamu ñà-ndùú derechu xi. Còó, chicá vaha dihna ni cuí, te (màdiá quideàjàn), vachi nú ducán, dandu mà cúí gá cachì xì nèhivì ñà-nduá cudî guá inì cachì xì-né, (divi ñà-có-xíquèn ni-iñàha).

16 Ñà-ndàà nduá, razón ndiaha xí Dios nduá cachitnùhi; doco có-nìhnú inì camánì nèhivì yùhù sàhámà, vachi nihnú inì ñà-fuerza cachitnùhi palabra mà, te ndahví (gà cuú inì) nú màsà cáchitnùhi razón ndiaha ma.

17 Ñàyùcànduá, nú cuisì yùhù nì chitnùnì inì cacanuì xì palabra mà nì cúí, dandu vihini coo ñà-cunduu nahi raya xi. Doco nú nihnú inì ñà-fuerza quide chuun ma, dandu sàhàjàn cundaà ini-ndà iin chuun ì nì nihí nùù mii-yá nduá.

18 Doco te nú ducán nì nihí chuun ma, dandu ¿índù iñàha cunduu tnùmanì nihitáhvi? Pues, divi ñà-uun-ni cachitnùhi xì nèhivì razón ndiaha xí Cristu, te có-quíyàhvi, mate iá derechu xi càquàn, doco có-xíquèàn nùù-né.

19 Yùhù, libre ié; còò ni-iin ana cachi xì nansa quide. Doco nihnú inì ñà-ìé` sujetu nùù nsidaa nèhivì áma vihini sàà stná-nè cunchicùn-nè ichì mii-yá.

20 Yùhù, voluntad xi chívàha stnáì estilu xi nècuàchì raza-xi Judea na hora cutnáhì xì-né, áma sàà dava-ne cunindisá stná-nè. Ñà-jaàn nduá quidé mate nùù yùhù có-ndiàá gà ley sàhana xì-némà, doco voluntad xi mií nchicuàn áma sàà stná dava-ne cunindisá stná-nè.

21 Daaní, nú ié` cutnáhì xì nèhivì có-nchîcùn estilu xi ley mà, dandu có-nchîcùn stnáì-ñà, áma

(chíndéé stná mà) ñà-cunindisá stná dava-ne ichì-yá. Doco màsà cúníhnú inì-nsia ñà-ndùí iin nèhivì còò ni-iin ley xi Dios nùù-xí; còò, vèchi nchícùn ndisa stnài ley xi Cristu.

²² Daaní, na ié` cutnâhî xì nèhivì mà-fuerte anima-xi, dandu quidá stnài na quidá mii-né, áma níhì dacuní stnài dava-ne ichì váha. Vèchi ducání quidé xì nsidaa nèhivì: nacua quidá mii-né, ducán quidá stnài, áma sàà stná-nè càcu anima-nè.

²³ Nsidaa ñà-jaàn quidé sàhà-ñá chicá quee tnũñuhu xí razón ndiaha xí-yá, dandu nìhìtáhvi stnài iin ñà-ndiaha sàhà palabra mà.

²⁴ Sà-ínáhá-nsiâ, na xinú tècuachi carrera, cuisì imindaa-té níhì xì premiu, mate cuáhà-té nì dàdává stnahá-te. Pues ducání iá stná xì ndohó, xiñuhu cuàhandee ini-nda, dandu nìhìtáhvi stná-ndà nùù-yá.

²⁵ Daaní, nú cuàhàn tècuachi ma dadavá stnahá-te ducán, xíndiaa stná-te mii-té, có-quidá ndevàha-tè xì mii-té (áma níhì-té cóó fuerte-te). Te ¿índù chuun? Divì sàhà-ñá cuní-te nìhì-té (iin premiu tii) mà cúnáhá ni-iin ratu, iin sìcàtè ndahà cuì yutnù cuñuhu dìni-té. Doco ndohó, iin corona ndiaha mà nunca cutuhú nduá nìhì-ndà nú ni cuàhandee ini-ndà (cunchicùn-ndà mii-yá).

²⁶ Ñàyùcàndùá, yùhù sáhandee cahnú inì, nahi tè-xinú carrera, doco ináhî índù nùù-xí cuàhìn. Te na quidá stná tècuachi ídiquí box, ducán sáhandee stná inì, doco có-ídiquí uin; ináhî ñà-nduá quidé.

²⁷ Sadí nùù ñà-xíhoé quide. Có-sâhi ñà-quida ndevàhi xì míí, còtó mà nátùì guè nùù mii-yá mate cuáhà gá sàni càhìn xì nèhivì dava ga sàhà ichì-yá.

10

Màsà cáhví-ndá figura nahi nìsa quida nèhivì Israel sàhana na ní caquee-ne ñuu Egipto

¹ Ñàní, cuní cundaà inì-nsia nansa nì cuu xi nèhivì sàhana, nsidanicuú-né (nì chindee Dios-né), nìsa xìca-ne tixi còndàhvì iin vòcò xí-yá, te nsidaa-né nì yàha uun stná-nè mahì mar yucán.

² Ñàyùcàndùá, na ian cùù-xì-ndà na cuhî-ndà, ducan quida-nda cuenta sàhà mii-né na ian nì cuhì stná-nè tixi vòcò mà xì ini mar mà, te ducán nì nanduu-ne nèhivì xí Moisés.

³ Daaní, iin-nì nìsa itiacu stná nsidaa-né ñà-ndùá nì sàhatahvì Dios-né,

⁴ te iin-nì nìsa xihì stná-nè tècuí ndiaha, divi tècuí nì cana nùù iin cavà. Te cavà mà, seña nì sandua nahi Cristu, vàchi nì cutnahá stná-yà xì-né ichì cuàhàn-né.

⁵ Pues mate ducán nì cuu xi-né, doco cónì ndóo ini Dios xì modo xi-ne, te ñàyùcàndùá cuàhà sàstnùhù-né nì xihì nùù yucù yucán.

⁶ Cunaha-nsiá, nsidaa ñà-ndùá nì cuu xi nèhivì sàhana ma, divi sàhà-ñá cundaà ini ndohó vichi nduá, màdí nchihò stná ini-ndà quida chicuéhè-ndà na ian nì quida mii-né.

⁷ Ni màsà cáhvì stná-ndà figura na ian nì quida dava-ne, vàchi ducán nacání tutu ì: “Nì sàcùndoo-ne nì xixi-ne, te nì xihì-ne, dandu después nì ndacuìta-ne nì ìtasaha-né (nùù figura xi-ne)”, cachá.

⁸ Ni màsà cáhàn-ndà xì ana cónì nándàhà xì-ndà nacua nìsa quida dava nècuàchì yucán, vàchi después nì xihì òcò ùnì mil-nè iin quìvì-ní.

9 Ni màsà quidá canúú-ndá ñà-có-cùní Stoho-ndà Señor, vèchi ducán nì quida dava-ne, te sàhájàn nì ndecoyo cuàhà còò, nì tñii-sìné, te nì xihì-nè.

10 Ni màsà cáhàn ndiaa-ndà (dìquì-yá) nacua nì quida dava-ne, te nì ndañuhu cuàhà-né nì quida ángel xi-ya.

11 Cunaha-nsiá, nsidaájàn nì cuu xi nècuàchì sàhana ma sàhà ñà-nì cúndáà ini-ndà (màsà quidá stnâ-ndà ducán). Vèchi divi sàhà ndohó nì tiaa nsi-daámà nùù tutu ìì sàhà-ñá cundaà ini-ndà nansa quida-nda quivì vichi na xínu tiempu.

12 Ñàyùcàndùá, nú nihnú ini-ndà sà-ìá vaha-nda nùù Dios, dandu ni caquín-ndà cuidadu còtó sàà-ndà quida stná-ndà iin cuàchì có-nìhnú ini-ndà.

13 Nsidaa ñà-ndùá yáha-nda vichi, cuisì ñà-ndòhó stná nsidanicuú nèhivì ñuhìví nduá. Te vátùni cahví vii-ndà xì-yá ñà-mà cuáha-ya cuu xi-nda ñà-ndùá mà cúndéé ini-ndà sàhà-xí. Còó, vèchi (nú cuàhàn-ndà quida-nda iin cuàchi ni cuí), dandu siempre datúi Dios nansa càcu-nda nùájàn sàhà-ñá vátùni quidandee ini-ndà.

14 Ñàyùcàndùá, cuidadu ni cúndóó-nsiá, ñani màní; màsà nunca cahvi-nsiá ni-iin figura.

Cuisì nùù Dios ni cuáha-nda promesa xi-nda; te màsà cáxi-nda ò cúxí-ndá ñà-ndùá nì chindoo nèhivì nùù figura

15 Cuàhìn cachì xì-nsiá iñàha, te mii-nsiá cachi-nsià xí, amádi ndisa á coó, vèchi quidé cuenta xínduu-nsia nèhivì cundáà inì-xì.

16 Na (nacuítáhvi-ndà, xihì-nda) ñà-ñùhú copa ndiaha ma, te naquímànì-ndà mii-yá. Pues ducan

quida-nda, te nihnú ini nsidaa-nda ñà-sàhà ndohó nì xitià nù-yá. Te na xixí stná-ndà pan ì, dandu iin-ni nihnú stná ini nsidaa-nda nansa nì sàha-ya iquicúñú-yà (sàhà-ndà). Sà-ìnáhá-nsiâ nsidaájàn.

17 Ñàyùcànduá nahi imindaa nèhivì sàni nanduu nsidaa-nda, mate cuáhà-ndà ndoó, vâchi iin-ni pan (ì) xixí nsidaa-nda.

18 Cundehè-nsiá nansa xíquida nècuàchì raza Israel nú sàni sàha-ne iin quisì nduú promesa, te nì xihì-si nùù mesa ì, dandu después saxí-né cuñù-si. Pues sàhà ñà-sàxí-né promesa mà, nàhà xicà xínduu stná-nè ana (nihnú ini xì religiòn mà).

19-20 Pues cachí nsidaájàn xì-nsiá, doco có-cùní cachàmà ñà-ìtiácú ndisa figura cahvi nèhivì có-ìnáhá xí Dios, ni có-cùní cachi stná ñà-ndiàá ndisa promesa sàha-neñà. Còó, doco cunaha-nsiá, iá ndisa ana dìnúù-xí sàha-ne promesa xi-ne. Divì nùù ñà-malu sàha-neà, màdì nùù Dios. Te yùhù, có-cùní dahuin cunihnu ini-nsià quisì mà.

21 Vâchi còò permisù cuitahvì-ndà coho-nda copa ì xí Dios, te después coho stná-ndà ñà-nduá sàha-ne ñà-malu; còó. Vâchi còò permisù cuxi-nda pan ì xí Dios, te después cuxi stná-ndà ñà-dàcùxí-nèsi.

22 Mii-nsiá, ¿a ndísá cuní-nsià dacuídà ini-nsià Stoho-ndà Dios ducán? ¿A tuxí ini-nsià chicá fuerte-nsià nùù-yá? (Doco mà ndísá.)

23 (Ñà-ndàà nduá), libre iá-ndà quida-nda nacua cudí ini-ndà, doco (xiñuhu nsinuu ini-ndà) màdì nsidaa iñàha nduú iin ñà-vàha. Libre iá-ndà, cachí-ndà, doco màdì nsidaa iñàha nduú iin ñà-cuàhàn chindee xi-nda.

24 Ñàyùcànduá, màsà nándúcú-ndá ñà-nduá cudû inì-ni mii-nda; chicá ndiaha nanducu-nda nansa chicá yàha vàha ñanìtnaha-nda.

25 Nsidaa cuñu dicó tè-dicó yàhvi, vátùni caxì-ndañá. Còò necesidad nacani ini-ndà ndàcàtnùhù-ndà sàhámà,

26 vàchi Stoho-ndà Señor nduú stoho nsidanicuú iñàha iá ñuhìvì yohó.

27 Daaní, na cánà-ndà cùhùn-ndà iin vicò iá vehe iin tiàa có-xiníndísá-xí-yâ, te cudû ini-ndà cùhùn-ndà, dandu vátùni caxì stná-ndà nsidaa ñà-nduá taxí nècuàchìmà; ni màsà ndàcàtnùhù-ndà sàhà comida mà; màsà nácánì ini-ndà sàhà.

28 Doco vihini cachi iin nèhivì xì-ndà: “Cuñu yohó, promesa nì sandoo nùù figura cahvi-né nduá”. Pues nú ducán, dandu sàhà nècuàchìmà màsà cáxi-nda cuñu mà, còtó cuduchi ini-nè, vàchi vihini quida-ne cuenta nduájàn iin cuàchi.

29 Mate có-quidá mii-nda cuenta ducán, vihini nihnú ini mii-né ducán.

Doco ndohó, vihini cachi-ndà ñà-libre iá-ndà, te màdiá fuerza icúmí-ndá quida-nda ñà-nduá cuní inga nèhivì cachí ìì gá inì-xi.

30 Vàchi naquímànì-ndà Dios sàhà ñà-nduá saxí-nda, ñàyùcànduá còò ñà-dìsàhà-xí cundoo nèhivì cuitnùhu-nèndó sàhà ñà-nduá saxí-nda.

31 (Vihini cachi-ndà ducán, doco de todos), nsidanicuú ñà-nduá quida-nda, sàhà ñà-nì quèé gá tnùñuhu ndiaha xí Dios ni cúnduá, a ducán saxí-nda ò xihì-nda iñàha, te ò ndéni iñàha ni quida-nda.

32 Màsà dácûdúchí ini-ndà ni-iin nèhivì, a ducán nduú-né iin nècuàchì raza Judea, ò iin nèhivì inga

raza (có-xiníndísâ), te ò iin nèhivì cahvi víi xi-yá.

³³ Iin-ni ni quidá stná-nsià nacua quidá yùhù, có-nàndúquí ñà-cudiì inì mií, cuisì-ní quidé lucha ñà-màsà cúdúchí ini nèhivì sàhí, dandu vihini sàà stná-nè càcu anima-nè.

11

¹ Ñàyùcànduá, nacua quidá yùhù, ducání quida stná mii-nsiá, vèchi divi Cristu nduú ana nchícuìn.

Nansa xiñuhu quida nècuàchì ñahà na natácá-ndà

² Cuaha-ni quidá-nsiá, ñánì, vèchi iin-ni nsinúú inì-nsia yùhù, te nsinúú stná inì-nsia palabra nì cachì xì-nsiá ñà-chivàha-nsia.

³ Te vichì cuní cundaà inì-nsia ñà-divi Cristu nduú ana dandacú nùù nsidaa nècuàchì tiàa, te nècuàchì tiàa nduú ana dandacú nùù nècuàchì ñahà, ducání nacua dandacú stná Yua-nda Dios nùù Cristu.

⁴ Cunaha-nsiá, có-nduá ducán càcàn tàhvì iin tiàa nùù Dios nú ñuhú-né mbelu, ni mà váha cachitnùhu stná-nè razón xi-ya nú ñuhú-néàmà, vèchi có-nduámà tnùñuhu xí dìnì-né.

⁵ Doco nècuàchì ñahà, nú xícàn tàhvì-né, ò cachitnùhu-ne razón xi-ya, te có-îdàhvì dìnì-né ni-iñàha, dandu xiñuhu cucahan nùù-né sàhà dìnì-né, vèchi davani queámà na ian sàni dàté tehe-né.

⁶ Vèchi nú có-îdàhvì dìnì-né ni-iñàha, dandu chicá vaha ni dátê cuati dìnì-né. Te nú ni cúcáhán nùù-né dàté cuati-né, ò dátê tehe-né, dandu xiñuhu ni cudàhvì dìnì-né.

⁷ Iin nècuàchì tiàa, có-xiñùhù cudàhvì dìnì-né, (na xícàn tàhvì-né), vèchi nacua iá mii-yá ducán nì quidayucun-yànè, ñàyùcànduá, xiñuhu tavà-né tnùñuhu xí-yá; doco nècuàchì ñahà, tnùñuhu xí

nècuàchì tiàa tavá-né, ñàyùcàndùá (xiñuhu ni cùdàhvi dìnì-né).

⁸ Vàchi màdì (iin iquì) nècuàchì ñahà ni cùyúcùn nècuàchì tiàa. Còó. Iquì tiàa ni cuyucun nècuàchì ñahà.

⁹ Te divi sàhà-ñá chindee-né iì-né, ñàyùcàndùá ni sàcòo-ne, màdiá ni sàcòo tiàa ñà-chindee-né nècuàchì ñahà.

¹⁰ Ñàyùcàndùá, xiñuhu cudàhvi dìnì nècuàchì ñahà, te cunduamà seña ñà-íá ana dàndàcù-xì núù-né. Te sàhà stná (indéhe) ángel xi Dios, ñàyùcàndùá xiñuhu quida stná-nè ducán.

¹¹ Doco có-càchí ñà-cuisì nècuàchì tiàa nduú ana ndiáá, ni có-càchí stnáì ñà-cuisì nècuàchì ñahà ndiáá stná; còó, vachi nú ndoo-nda núù Stoho-ndà Señor, dandu iin-ni xiñuhu stnahá nsidaa-nda.

¹² Ñàyùcàndùá, mate iin (iquì) nècuàchì tiàa ni sàcòo nècuàchì ñahà, doco vichi nècuàchì ñahà nduú ana datúinuù xì nècuàchì tiàa. Doco cunaha-nsiá, mii Dios nduú ana chítnùní inì-xi sàhà nsidanicuú iñaha.

¹³ Mii-nsiá cachi-nsià xí nansa tuxí inì-nsia: ¿a vátùni íá cahan-nsiá nú ni cacán tàhvi iin nècuàchì ñahà nú uun-ni íá dìnì-né?

¹⁴ Pues, nsidaa-nda, ducání ináhá-ndá cucáhán núù iin nècuàchì tiàa nú ni ndunaní ididíni-né.

¹⁵ Doco nècuàchì ñahà, còó, cuahà gá cudíi ini-nè nú naní ididíni-né, vachi na iñaha ídàhvi dìnì-né nduá, te ducán ni nihítàhvi-né coo-ne.

¹⁶ (Pues ñà-jaàn nduá cachí xì-nsiá), doco nú có-ndòo ini iin nèhivì xì palabra yohó, dandu ni cúnáhá-nè cuisì ñà-jaàn nduú estilu xi-nda, te divi ñà-jaàn nduú stná estilu xi nsidaa gá nèhivì cahvi xi Dios.

Nansa nì cachi Pablo xì nècuàchì ñuu Corinto ñà-có-quidá víi-né na nacuíáhvi-né Cena ì xí Stoho-ndà Señor

¹⁷ Vichi cuàhìn cachì xì-nsiá iñàha, doco màdiá ndeníhí vahi mii-nsià nduá; còó, vachi cunaha-nsiá, có-quèé víi na natácá-nsià; mal queá.

¹⁸ Primeru cuàhìn càhìn xì-nsiá sàhà-ñá tucu tucu nihnú ini iin iin grupu-nsià, vachi ducán cachì nèhivì xí, te tuxí inì vihini ñà-ndàà ndua.

¹⁹ Vachi vihini cachi stná-ndà ñà-ìcúmí coo itnii grupu nùù-nsiá sàhà-ñá cundaà vaha ini-ndà ana xínduu nècuàchì chicá ndiaá, (doco màdi ñà-cáhàn sàhnù-ndà cundujàn).

²⁰ Ñàyùcànduá, yùhù cachí, màdiá nacuíáhvi ndisa-nsia Cena ì xí Stoho-ndà Señor nduá na natácá-nsià jaàn.

²¹ Vachi cada iin iin-nsia, yachì quesáhá-nsiá xixí-nsiá ñà-nduá nihí iin iin-nsia, te dava ga nèhivì, ni có-sàà comida xi-ne, te dava ga-nè, dècuèndè xihí-né.

²² Cunaha-nsiá, vehe-nda nduú lugar ndé ndiá ìcà-ndà cuxi-nda ducán. Màsà quidá-ndá relaju na natácá-ndà, vachi nèhivì xí Dios xínduu-nda. Ni màsà dándúcáhàn-ndá ñanìtnaha-nda nduú nècuàchì ndahví. Pues, ¿nansa tuxí inì-nsia? ¿A cuàhìn ndenihì vahi-nsiá sàhà ñà-nduá quidá-nsiá? Còó, mà quidéa.

Nansa nì quida Jesús Cena ì primeru

²³ Nùù meru mii Stoho-ndà Jesús nì nihí palabra nacání nansa nì quida-ya na ní sanduu ñuú quivì nì cahìn-teyá. Te divì palabra yucán nduá sàni nacani xì-nsiá, nansa nì tnii-ya pan,

24 te nì naquimanì-yá (Yua-yá) sàhà-ñá, dandu nì dàcuàchí-yáñà, te nì cachi-yà: “Nahi iquìcúñú míí nduá yohó, te divi iquìcúñúí nduá sáhatahvì sàhà mii-nsiá. Te nacua quidé vichi, divi ducán icúmí-nsiâ quida stná-nsià sàhà-ñá nsinuu inì-nsia yùhù”, nì cachi-yà.

25 Daaní, na ní nsihi nì xixi nsidaa-né, dandu nì tnii-ya pocillu, te nì cachi-yà: “Ñà-ñùhú pocillu yohó nduú seña xi ichì saa nacóí cunchicùn nèhivì, vàchi nahi nìí nduá. Te cada coho-nsia ndutè yohó, dandu nsinuu inì-nsia yùhù”, (nì cachi Stoho-ndà Señor).

26 Te ndisa, cada xixi-nda pan mà, te xihì-nda ndutè ì mà, ñà-jaàn nsinúú ini-ndà ñà-nì xihì-yà (sàhà-ndà), te iin-ni icúmí-ndá quida-nda ducán dècuèndè cachi sàà quivì naxicocuñ-yà.

27 Ñàyùcànduá, nú cuní-ndà nacuitahvì-ndà cuxi-nda pan xi Stoho-ndà Señor, ò coho-nda yà-ìì xí-yá, dandu màdiá nansa ni nì cui ni quida-ndañá, vàchi nú ducán, dandu cuàchi cundua, vàchi ñà-cóni chívàha-nda tnùñuhu xí iquìcúñú-yà xì nìí-yá nduá.

28 Ñàyùcànduá, xiñuhu nacani vaha ini-ndà, te ndundoo anima-ndà, dandu vètuni nacuitahvì víi-nda pan mà, te coho-nda yà-ìì mà.

29 Vàchi nú có-nìhnú ini-ndà pan mà nduú nahi cuerpu xi-ya xixì-ndà, te xihí stná-ndà yà-ìì mà, dandu dacuidá cuàchi-nda mii-nda na quida-nda ducán.

30 Pues, divi ñà-jaàn nduú meru ñà-dìsàhà-xí cuhí cuàhà-nsiá, te ndohó-nsiá quidá cuèhè; dècuèndè sàni xihì stná dava-nsia.

³¹ Chicá vaha nacani vaha ini-ndà, te ndundoo vii anima-ndà antes, dandu mà níhì-ndà castigu.

³² Doco te nú níhì-ndà iin castigu nùù-yá, divi ñà-sáha-yàndó conseju nduájàn sàhà-ñá màsà ndáñuhú dahuun-nda nahi dava ga nèhivì ñuhiví.

³³ Ñàyùcàndùá, na natácá-nsià, cundiatu-nsia cundoo nsihi-nsia, ñánì, dandu vètùni cuxi-nsia.

³⁴ Doco nú xìhì ndisa iin nèhivì doco, dandu chicá vaha ndè vehe-ne ni cuxí-né, te màdiá nihì-nsiá castigu na natácá-nsià cundua. (Ñà-jaàn nduá cachí xì-nsiá vichi) ndè cachi nasai yucán, dandu ndatnuhu gué` xì-nsiá sàhà chuun iá gà.

12

Nansa iá ñà-ndùá níhìtáhvi ndiaha-nda cutáhvi-ndà nùù Espíritu Ì

¹ Yùhù cuní cundaà ini-nsià sàhà ñà-ndùá níhìtáhvi ndiaha-nda nùù Espíritu Ì, ñánì.

² Sà-ínáhá-nsiâ nansa nì saquida-nsia antes na táñaha ga cunindisá-nsiá mii-yá, cuisì nacua nìsa cachi nèhivì xì-nsiá, ducán nìsa quida-nsia, nìsa cahvi-nsiá cuàhà figura xì yùù, mate có-càhàn mà.

³ Ñàyùcàndùá, cuní cundaà inì-nsia palabra yohó: nú ndisa Espíritu Ì xí Dios nduú ana chindéé xí-ndá càhàn-ndà, dandu mà nunca cachi-ndà sàhà Jesús ñà-có-ndiáá-yà. Te davani stná, nú màsà chindéé Espíritu Ì ndohó, dandu mà cúí cachi-ndà: ñà-cuisì Jesús nduú Stoho-ndà Señor (dandacú inicutu).

⁴ Cunaha-nsiá, nsidanuu clase ñà-ndiaha sàni nihìtáhvi-ndà nùù-yá, doco imindaa Espíritu Ì xí-yá nduú ana nì dàcútáhvi xì-ndàñá.

⁵ Te cuàhà gá stná modo xinúcuáchí iin iin-nda nùù-yá, doco imindaa-ní Stoho-ndà Señor nduú ana xinúcuáchí-ndá nùù-xí.

⁶ Te cuàhà gá stná chuun ndiaha quidá Dios ini anima iin iin-nda, doco imindaa-yá nduú ana quidà-xì nsidaájàn.

⁷ Te iin iin-nda sàni nìhìtáhvi nansa chindee ndiaha Espíritu Ìi ndohó sàhà ñà-vàha xi nsidaa-nda.

⁸ Dava-nda, sàni nìhìtáhvi-ndà ñà-càhàn nchichí-ndà. Te dava-nda, sàni nìhìtáhvi-ndà ñà-cundaà tùí ini-ndà, doco mismo mii Espíritu Ìi nduú ana chindéé xí-ndá ducán.

⁹ Daaní, dava tu-nda, nùù mismo Espíritu Ìi sàni nìhìtáhvi ndiaha-nda cucumi váha-nda fe; te dava tu-nda, nì nìhìtáhvi-ndà dandúvaha-nda nèhivì, doco mismo Espíritu Ìi nduú ana nì sàhatahvi xì-ndà ducán.

¹⁰ Te ò vihini nì nìhìtáhvi-ndà quida-nda milagru ndiaha, te ò cachitnùhu-nda ñà-nduú razón ndiaha xí-yá. Te dava ga tu-nda, vètuni cundaà ini-ndà a díví Espíritu Ìi, ò iin ñà-malu nduú ana quida-xi iñàha. Daaní, dava tu-nda, tùha-nda càhàn-ndà inga dàhàn sàà, te dava ga tu-nda cachitnùhu-nda nansa cuní cachi dàhàn sàà mà.

¹¹ Doco nsidanicuú ñà-ndùá nì nìhìtáhvi-ndà mà, divi Espíritu Ìi nduú ana chindéé xí-ndá quida-nda ducán, te iin iin-nda nìhìtáhvi-ndà según nansa chítnùní ini-yà cuàhatahvi-yándô.

Nahi iquìcúñú mii-yá xínduu nsidaa-nda

¹² Ndohó, iá ndahà-ndà, te iá sàhà-ndà; cuàhà iñàha sàni nìhì iquìcúñú-ndà cucumiá, doco mindaa cuerpu xi-nda nduá. Mate cuáhà iñàha quidá,

doco imindaa-ní cuerpu nduá. Pues, ducán iá stná Cristu xì ndohó na ian ndohó xì iquicúñú-nda.

¹³ Vàchi nsidanicuu-nda, nahi iin-ni cuerpu xi mii-yá sàni nanduu-nda na ní nduhii anima-nda nì quida Espíritu Ìi xí-yá. Vàchi iin-ni Espíritu Ìi sàni ñihítáhvi ndiaha nsidaa-nda, ò xínduu-nda nècuàchì raza Judea, te ò nècuàchì inga raza, có-quidámà, ò xínduu-nda nècuàchì libre, te ò nècuàchì ndoó ana dandàcù-xì núù-xí.

¹⁴ Sà-ínáhá-ndá, iá ndahà-nda, iá sàhà-nda; màdi uun-ni iá iquicúñú-nda.

¹⁵ Pues (nú ni cuí càhàn) iin sàhà-nda, vihini cachà: “Còó; yùhù, có-ndùí iin ndahà, ñàyùcàndùá, có-ndùí cuerpu yohó”. Pues mate ducán ni cachá, doco iin-ni nduá sàhà-nda.

¹⁶ Te nú ni cachí stná tùtnù-nda: “Còó, yùhù, có-ndùí iin nduchìnúù, ñàyùcàndùá có-ndùí cuerpu yohó”. Pues, mate ducán ni cachá, doco divi iin-ni nduá tùtnù-nda.

¹⁷ Vàchi nú cuisì nduchìnúù-nda ni cúndúú ini-cutu-nda, dandu ¿nansa cui tiacu-nda? Te nú cuisì tùtnù-nda ni cúndúú-nda, dandu ¿nansa cui sahan iñàha dìtnì-nda? Mà cúí.

¹⁸ Ñàyùcàndùá, sàni quidavàha Dios iquicúñú-nda xì nsidaa ñà-ndùá xichúân, te nsidaámà iá chuun quidá según nansa nì chitnùnì ini-yà.

¹⁹ Vàchi nú cuisì iin-ni chuun ni cuí quida cuerpu xi-nda, dandu mà cúndúú ndisa-nda nèhivì.

²⁰ Doco còó, mate iin-ni cuerpu xi-nda nduá, doco nsidanuu clase chuun quidá.

²¹ Ñàyùcàndùá, có-íá vaha cachi nduchìnúù-nda xì ndahà-nda: “Có-xìñùhí mii-ní”. Ni mà váha

cachi stná dìni-ndà xì sàhà-ndà: “Có-xiñhùhí mii-ní”.

²² Còó, vèchi mate iá dava xaan xi-nda tuxí ini-ndà có-xiñhùhù guá, doco nahnú chuun quidá.

²³ Te nú iá ndé tuxí ini-ndà mà vícò iá, divi jaèn chicá ndiaá-ndà, te saquín-ndà cuidadu sàhà-ñá màsà cúcáhan núu-ndà.

²⁴ Vèchi ndé vico-ni iá, có-xiñhùhù (cundiaa guá-ndañá). Pues ducán nì chitnùní ini Dios coo cuerpu xi-nda sàhà-ñá chicá cundiaa-ndà ndé xi-nda có-ndiaá cachí-ndà mà.

²⁵ Dandu nsidaa ndahàsàhà-ndà, icúmíá chindee tnahá, te iin-ni coo vì iquicúñú-ndà.

²⁶ Vèchi mate imindaa lugar xi cuerpu-ndà ndohó, doco inii iquicúñú-ndà cuú stná sentir. Te nú cudî ini iin xaan xi-nda nahi ndahà-ndà, dandu inii cuerpu xi-nda cudî stná inìa.

²⁷⁻²⁸ Pues vichi cachí xì-nsiá ñà-nahi iquicúñú Cristu xínduu nsidaa ndohó nècuàchì cahvi xi-yá, te iin iin-nda sàni sàhatahvì-yá chuun quida-nda nùu-yá nacua quidá sàhà-ndà, ò ndahà-ndà. Di-hna nsiùhù nècuàchì apóstol sàni nihitáhvì-nsí ñà-cacanu-u-nsi quida-nsi chuun xi-ya. Daaní, nchícùn gà ana xínduu nècuàchì cachítñuhu razón ndiaha xí-yá. Daaní, nchícùn gà nècuàchì chináhá palabra ì. Daaní, ndoó stná nècuàchì quidà-xì mi-lagru, xì stná nècuàchì dandúvaha xi-nda. Te ndoó stná nècuàchì xicánúú chindéé xí ñanìtnaha-xì, xì stná nècuàchì dandacú, xì stná nècuàchì cáhan inga dàhàn sàà.

²⁹ Pues, nàhà xìcà màdì nsidaa-nda ni níhì-ndà chuun cunduu-nda apóstol; ni màdì nsidaa-nda tùha-nda cachitnùhu-nda razón ndiaha xí-yá, te màdì nsidaa stná-ndà tùha-nda chinaha-ndà

nèhivì; còó. Ni màdì nsidaa-nda quida-nda milagru,

³⁰ ò dandúvaha-nda nèhivì. Ni màdì nsidaa stná-ndà cáhàn-ndà inga dáhàn sàà, ni mà túha nsidaa-nda cachitnùhu-nda nansa cuní cachi dáhàn sàà mà. Còó.

³¹ Doco de todos modos, iin iin-nda xiñuhu cudii cuáhà ini-ndà nihitàhvì-ndà más gà ñà-chicá ndi-aha sàni cachi mà. Doco cunaha-nsiá, iá inga ichì chicá nsiha cunchicùn-ndà, te vichi cuàhìn cànìn xì-nsiá sàhámà.

13

Divi ñà-cuu stnahá ini-ndà sàhà-ndà nduú ichi chicá nsiha

¹ Ni cachí-ndà sàni nihitàhvì-ndà cáhàn-ndà nsidanicuú dáhàn ñuhivì xì ndè stná dáhàn ángel, doco nú có-cuú stnahá stná ini-ndà sàhà-ndà, ni mà cúndiáá nsidaámà, vèchi ducán queé ñà-cáhàn-ndàmà (nahi ruidu-ni), na ian cadi úún iin càa, ò iin platillu.

² Te ò vihini sàni nihitàhvì-ndà cachitnùhu-nda razón ndiaha, te sànihì stná ini-ndà sàhà nsidaa chuun nsiha chicá dèhé, te ináhá stná-ndà nsidan-icuú iñàha, te iin-ni icúmí vâha-nda fe, dècuèndè vètùni dandacu-nda, te cuxio iin yucù. Doco te nú cô-cuú stnahá ini-ndà sàhà-ndà, dandísá uun-ni nduú nsidaa ñà-nduá tùha-nda quida-ndama.

³ Te nú ni dasán nsíhí-ndá ñà-cuicà-ndà, te ò ni cuáhà-nda coco-nda (sàhà iin chuun vâha), doco te nú cô-cuú stnahá ini-ndà sàhà-ndà, ni-iyuhu mà cúndiáá nsidaámà.

⁴ Cunaha-nsiá, nú cuú stnahá ini-ndà sàhà-ndà, dandu mà úhì coo calma-ndà xì nèhivì, te cuhì ini-ndàné. Te mà cúmbìdia stnahá stná ini-ndà

sàhà-ndà, nú ducán. Ni mà cútúxí stná ini-ndà mii-nda nduu-nda mii-nda, ni mà cúndàa cuadú stná-ndà.

⁵ Vàchi nú cuú ndisa ini-ndà sàhà iin nèhivì, dandu mà quídá-ndá ni-iin ñà-quini xi-né. Ni mà cóo interesadu stná-ndà, ni mà cuídà yàchì stná ini-ndà sàhà-né, te mà chùhún stná ini-ndà sàhà-né.

⁶ Vàchi cunaha-nsiá, nú cuú ndisa ini-ndà sàhà iin ñanìtnaha-nda, dandu mà cúdíì ini-ndà nú ni quídá-né iin ñà-có-ndiàá. Còó, ñà-cunchicùn vìi-né ichì ndáà nduá cuní-ndà quida-ne, nú cuú ini-ndà sàhà-né.

⁷ Te nú màni-né nù-ndà ducán, dandu mà úhì quidandee stná ini-ndà sàhà-né; ni mà úhì cahví stná-ndà xì-né ñà-chicá quida vìi-né de-spués, vachi siempre íá tnùndé ini, cachi-ndà, te vátùnì cucumi-nda paciencia.

⁸ Cunaha-nsiá, vaxi iin quivì, te mà cóo gá necesidad cachitnùhu nèhivì xì-ndà iin razón xi Dios, ni mà cáhàn gà-ndà dàhàn sàà, ni mà cóo cá stná necesidad cachitnùhu-ya xì-ndà iin ñà-có-ínáhá-ndá. Doco ñà-cuu stnahá ini-ndà sàhà-ndà, mà nunca ndutámà nù-nyá.

⁹ Quivì vichi, có-ínáhá nsihi-nda nsidaa iñàha; còó. Stná iin palabra dacáhàn-yà nèhivì, có-nduámà iin palabra cachitnùhu nsihi xi-nda nsidanicuú iñàha; còó.

¹⁰ Doco na sáà quivì cununa ndisa ñuhivì, dandu mà cáhàn gà-ndà nsidaa ñà-có-íá nsihi ma.

¹¹ Na tí, nahi mée nìsa cahìn, vachi nacua nacání ini nsidaa-vé, ducán nìsa nacani stná inì; ducán nìsa nihnu inì. Doco vichi sàni sahnui, te ñàyùcànduá, có-quídá gué` nahi mée.

¹² Te ducán icúmí coo stná xì-ndà después. Vàchi quivì vichi indéhe-nda (nansa yáha-nda, doco có-cùndáà vâha ini-ndà), vâchi na ian indéhe-nda nùù iin yùtátá có-tùí víí, ducán nduá. Doco vâxi iin quivì, dandu mà cóó gá ducán, vâchi vivíí-ni icúmí-ndá cundehè claru-ndà mii-yá. Quivì vichi cuisì iyuhu-ní cundáà ini-ndà, doco quivì yucán icúmí-ndá cundaà vâha ndisa ini-ndà nacua cundáà ini mii-yá sàhà ndohó.

¹³ Ñàyùcàndúá, ùnì iñàha xiñuhu quida-nda vichi. Ni cúcúmí vâha-nda fe, te ni cúníhnú vâha ini-ndà ñà-siempre chindee-yándô; daaní, ni cúcúú stnahá stná ini-ndà sàhà-ndà. Doco nùù nsì-ùnì ñà-jaàn, chicá ndiaá ñà-cuu stnahá ini-ndà sàhà-ndà.

14

Nansa ndiá icà-ndà quida-nda na cáhàn-ndà inga dàhàn sàà quidá Espíritu Ìì

¹ (Ñà-ndáà ndua), xiñuhu cuu stnahá ndisa ini-ndà sàhà-ndà. Daaní, cuní stnáì nanducu-nsiá nansa ñìhítáhvi gá-nsià más tàhvi ndiaha xí-yá. Te ñà-chicá cuní ñìhítáhvi-nsiá nduú ñà-cachitnùhu-nsia razón ndiaha xí-yá.

² Vâchi na cáhàn-ndà dàhàn sàà, màdì nèhivì ñuhiví cáhàn xì-ndà. Còó. Dios cáhàn xì-ndà, doco nèhivì ñuhiví, có-cùndáà ini-nè nansa cachí-ndà. Divi Espíritu Ìì chindéé xí-ndá cáhàn-ndà ducán, doco iin chuun iá dèhé nduá cachí-ndà.

³ Doco na cachitnùhu-nda razón ndiaha xí-yá, dandísá nèhivì ñuhiví cáhàn xì-ndà, vâtùni chindee-ndané ñà-chicá cunihnu viì ini-nèyà, te chicá nacuàhandee ini-nè.

4 Doco nú dàhàn sàà nduá cáhàn-ndà na natácá-ndà, dandu ñà-chindee xi anima mii-ni-nda nduámà. Doco na cachitnùhu-nda razón ndiaha xí-yá, dandu nsidanicuú nêhivì nácuàhandee inì-xi.

5 Mate cúdijì inì nú ni cuáhatahvì Dios nsidaa-nsiá ñà-càhàn-nsiá dàhàn sàà, doco chicá cudìì inì nú ni níhìtáhvì-nsiá cachitnùhu-nsiá razón ndiaha xí-yá, vâchi chicá ndiaha ñà-jaàn. Doco nú ni cáhàn-ndà dàhàn sàà, te después cachitnùhu stná-ndà nansa cuní cachi palabra mà, dandu vâtùni, vâchi (sàhà-ñá claru iá palabra mà) vâtùni nìhì stná nsidaa compañeru-ndà iin ñà-vàha xi mii stná-nè.

6 Ni cachí-ndà ni sâi ndé ndoó-nsiá, te cuisì-ní inga dàhàn sàà ni cáhìn xì-nsiá. ¿A vâtùni chin-deámà mii-nsiá, ñàni? Còó, vâchi xiñuhu ñà-nacani claru stnáì xì-nsiá iin palabra sàni dàtnùù ini Dios yùhù, te ò iin palabra nì cundaà tùi inì nì quida-ya, te ò nú coó, iin razón ndiaha nì quixi nùù-yá, te ò iin ñà-vàha cui chinahì mii-nsiá.

7 Vâchi dècuèndè stná ñà-quidándáá-ndá, ni cúndúá iin pitu, ò iin yutnù cuerda, nú nansa-ni nì cui ni quidándáá-ndáñâ, dandu mà cúndáà ini nêhivì índù yaa tavá-nda.

8 Stná corneta sivi soldadu, nú có-sivì vii-té, mà cúndáà ini compañeru-te ñà-sà-íá hora quidayucùn-te cùhùn-te guerra.

9 Te ducaní stná ndohó na cáhàn-ndà, nú có-càhàn claru-ndà (dàhàn mii-nda), mà cúí cundaà ini nêhivì nansa cachí-ndà. Uun-ni queamà.

10 Pues cuàhà gá dàhàn iá ñuhivì, te iin ian vâtùni càhàn nêhivì, te cundaà stnahá ini-nè.

11 Doco nú có-ináhá-ndá nansa cuní cachi dàhàn cáhàn iin nèhivì, dandu có-cùndáà ini-ndà nansa cachí-nè; nahi nèhivì inga ñuu xicà nduú-né, te ni mii-né, có-cùndáà stná ini-nè ñà-nduá cachí ndohó.

12 Pues ducaní stná mii-nsiá (xì dàhàn sàà cáhàn-nsià). Yùhù ináhî, yáha ga cuní-nsià nihítáhvi-nsiá cuàhà iñàha nùu-yá. Doco ñà-chicá xiñuhu nduá nihítáhvi-ndà iin ñà-chindee xi ñanìtnaha-nda natácá xì-ndà. Pues divi tàhvi clase jaàn nduá cuní nanducu-nsiá.

13 Ñàyùcànduá, nú sàtùha-nda càhàn-ndà inga dàhàn sàà, dandu xiñuhu stná ñà-càcàn tàhvi-ndà cuàhatahvi Dios-ndó ñà-cachitnùhu-nda nansa cuní cachi dàhàn mà na cáhàn-ndàñá,

14 vèchi na cáhàn-ndà ducán, inì-ni anima-ndà cáhàn stná-ndà, xicàn tàhvi-ndà nùu-yá, doco ini sàxìnítùnì-ndà, có-cùndáà ini-ndà nansa cachí-ndà.

15 Pues, nú ducán nduá, dandu ¿nansa chicá vèha quida-nda? Pues, cuàhàn-ndà càcàn tàhvi-ndà nùu-yá (xì dàhàn) ináhá espíritu xi-nda, doco màdì cuisì ñà-jaàn, Icúmí-ndá càcàn tàhvi stná-ndà nùu-yá xì iin palabra ñà-cùndáà ini-ndà. Stná ñà-coto-nda; cuàhàn-ndà coto-nda (xì dàhàn) ináhá espíritu xi-nda, dandu después coto stná-ndà iin alabanza cundáà ini-ndà nansa cachá.

16 Vèchi nú naquímànì-ndà mii-yá xì cuisì-ní dàhàn ináhá espíritu xi mii-nda, dandu ùhì cachi nècuàchì mà-túha “amén” (na ní nsihi nì càhàn-ndà), vèchi ni có-cùndáà ini-nè nansa cachí-ndà.

17 Pues, ñà-naquimanì-ndà Dios, divi naquímànì váha-ndayá, vètùnì iá` mà, doco có-nìhì

ñanìtnaha-nda cunduamà iin ñà-vàha xi stná anima mii-né.

¹⁸ Yùhù cachî, ansivéhé Dios, cuàhà gá cáhìn dàhàn sàà; chicá cáhìn ducán nù nsidaa mii-nsiá.

¹⁹ Doco nú sàni nataca-ndà ñà-cahvi-nda mii-yá, dandu chicá nsiaha cáhìn siquiera ùhùn-ni palabra ñà-cundaà ndisa ini-nsiá, te màdiá ùxin mìl palabra inga dàhàn mà-cúndáà inì-nsia, vèchi cuisì nú cundáà vaha ini-nsiá, dandu vètùni chinahì mii-nsiá iñàha.

²⁰ Màsà cúníhnú ini-nsiá nahi mée, ñánì. Vètùni iá nú nihnú iquin ini-ndà sàhà chuun chicuéhè iá ñuhivì; doco (nú chuun sahnú nduá), dandu xiñuhu nacani ini-ndà nahi nècuàchè sahnú, màdi gá nahi mée.

²¹ Nù tutu ìi dohó cachí mii-yá: “Icúmî cáhìn xì nècuàchè raza yohó, vèchi icúmî quixi nècuàchè inga ñuu càhàn inga dàhàn, te cuenta-xi icúmî-né càhàn-nè xì nècuàchè yohó, doco ni sàhà ñà-yúcán mà quíhín cásû-nè, cachí Stoho-ndà Señor”.

²² Ñàyùcàndüá, ñà-jaàn cundáà ini-ndà seña nduá càhàn-ndà dàhàn sàà, áma cúndáà ini nècuàchè có-xìníndísâ. Doco ñà-cachitnùhu-nda razón ndiaha, quidámà chuun sàhà nèhivì sàxìníndísâ, màdi sàhà nèhivì có-xìníndísâ.

²³ Ni cachí-ndà nú sàni nataca-nsiá, te càhàn iin iin-nsia dàhàn sàà, te yucán sàà stná nèhivì có-cúndáà inì-xi, ò nèhivì có-xìníndísâ. Pues ádi icúmî-né cachi-nè sàni culocó-nsiá.

²⁴ Doco nú cachitnùhu iin iin-nsia iin razón ndiaha xí Dios (dàhàn cundáà inì-xi), dandu dansínúú iniàmàné cuàchi quidá-né, te cundaà ini-nè nansa iá ndisa anima-né,

25 dècuèndè natùì vate stná ñà-nduá íá dèhé nì quida-ne antes. Dandu màcùitasisi-né ñà-cahvi-né Dios, te cachi-nè íá ndisa Dios nùù-nsiá.

26 ¿Ndíà nduá cuní cachi nsidaa ñà-jaàn? Pues dohó íá, ñánì: na natácá-ndà, iin iin-nda íá iin al-abanza coto-nda, ò iin palabra vaha chinaha-ndà, te ò iin ñà-ndiaha sàní dácùnì Dios ndohó, ò iin palabra xi iin dàhàn sàà, te ò cachitnùhu iin-nda ñà-nduá cuní cachi dàhàn sàà mà. Doco nsidaa ñà-jaàn, sàhà ñà-vàha xi nsidaa ana nì nataca ni cúnduá.

Nsidaa ñà-nduá quida-nda na natácá-ndà, xiñuhu quida vii-ndàñá, màdiá nansa ni nì cui

27 Nú ndoó nèhivì cuní càhàn dàhàn sàà, dandu vátùni càhàn ùi-nè, ò úni-nè, doco màsà yáha ùni-nè, te nì nsihi iin-ne, dandu quesaha inga-nè. Iin iin-ne ni cúcúmí-nè tiempu xi-ne càhàn-nè. Te xiñuhu coo stná iin ana cachitnùhu nansa cuní cachi palabra mà.

28 Doco nú còò ni-iin-nsia tùha cachitnùhu sàhà ñà-jaàn, dandu màsà càhàn nèhivì dàhàn sàà na natácá-nsià, cuisì-ní dècuèndè íá mii-né, dandu mii-né xì Dios cunini.

29 Daaní, nècuàchì cachítñuhu razón ndiaha xí-yá, vátùni càhàn ùi ò úni-nè, te ni cúní nì nèhivì dava ga, te cachi-nè a vátùni íá ñà-nduá nì cachi nècuàchìmà, á coó.

30 Doco nú yucán íá inga nècuàchì datnúù Dios sàxìnítnùní-xi iin palabra ndiaha, dandu xiñuhu cudadí nècuàchì primeru.

31 Vàchi nsidaa ana datnúù Dios iin razón ndiaha, vátùni cachitnùhu iin iin-ne razón mà na hora quidá-né tocar, dandu vátùni sàà nsidaa-nda cundaà ini-ndà, te nacuahandee stná ini-ndà.

³² Te nsidaa ana sàni nìhìtáhvi cachitnùhu razón ndiaha, icúmí-nè dandacú-né nùu anima mii-né, (a cáhàn-nè, á cóó).

³³ Cunaha-nsiá, màdì nansa-ni nì cui quidá ndevàha Dios ñà-nduá quidá-yá, cóò; viví-ni, te cuéyàà-ni nduú modo quidá mii-yá.

Nacua quidá nsidaa nèhivì xí Dios nsidaa lugar ndé natácá-nè cahvi-néyà, (ducán cuní quida stná mii-nsiá),

³⁴ màsà cáhàn nècuàchì ñahà na natácá nsidaa-nsiá ducán, vàchi cóò permisú. Icúmí-nè cunini-ne nacua cachí stná tutu nduú ley xi-ya.

³⁵ Nú cuní-nè ndàcàtnùhù-né, dandu ni cacán tnùhù-né nùu nècuàchì vehe-ne nú sàni nasaa-nè vehe. Vàchi có-nduá ducán cáhàn iin nècuàchì ñahà na natácá-nsiá.

³⁶ Cuní nsinuu inì-nsia ñà-màdì mii-nsiá ònùu-xí ni quésáhá palabra xi Dios. Ni màdì cuisì mii-nsiá nì xìnídísâ stná xì palabra mà.

³⁷ Te nú jaàn ndoó nèhivì tuxí inì-xi datnúu Dios sàxìnítùnì-xi, te ò ní nìhìtáhvi ndiaha-né cahàn-né, dandu xiñuhu cundaà stná ini-nè ñà-divi palabra yohó nduú palabra nì dandacú Stoho-ndà Señor.

³⁸ Doco nú cô-cùnì-nè nacuni-nè ñà-palabra ò xí mii-yá nduá yohó, dandu ni mii stná-nsià, màsà nácùnì stná-nsià-nè ñà-nduú-né ana nì nìhìtáhvi ndisa.

³⁹ Ducán iá, ñánì. Yùhù cuní nanducu-nsiá más gà nansa nìhìtáhvi-nsiá cachitnùhu-nsia razón ndiaha xí-yá. Te nèhivì cáhàn dàhàn sàà, màsà cádì-nsià nùu-né; cóó.

⁴⁰ Doco nsidaa ñà-nduá quidá-nsiá (na natácá-nsià), viví-ni ni quidá-nsiáña, te

iin iin-nsia (ni cáhàn-nsià) nacua nchícùn stnahá-nsiá.

15

Sàni natiacu ndisa Jesucristu

¹ Ñáni, cuní cundaà vaha ini-nsià sàhà palabra ndiaha nì cachitnùhi xì-nsiá daa. Vàchi nì xinindisá-nsiá palabra mà, te iin-ni dècuèndè vichi quidá stná-nsià seguir ducán.

² Te sàhà stná palabra mà icúmí-nsiâ càcu-nsia nú iin-ni ni cúníhnú vaha inì-nsiañà. Vātùni càcu-nsia, cachí, doco ¿a víhíni uun-ni quee ñà-nì xinindisá-nsiá ducán? (Còó),

³ vàchi cunaha-nsiá, palabra ndiaá ndisa nduá nì cachitnùhi xì-nsiá daa, vàchi divi nduú stná palabra nì nihí (nùù) Cristu, te nacáníámà nansa nì xihì-yà nì nacuida-ya cuàchi-nda nacua cachí nùù tutu ìì.

⁴ Dandu nì ndùxin-ya, doco tìxi ùnì quivì nì natiacu-ya nacua cachí stná tutu mà.

⁵ Dandu nì ndecunu-ya nùù Pedro xì nùù stná dava ga nècuàchì dacuahá-yá; ùxìn ùì nì sanduu-ne.

⁶ Daaní, después nì ndecunu stná-yà iin xichi na ní nataca más ùhùn cientu ñani-ndà. Te cunaha-nsiá, dècuèndè vichi xí-itiacu ìì cuàhà vá nècuàchìmà, doco dava-ne sàni ndàhvà-nè ñuhívì yohó.

⁷ Daaní después, nì ndecunu stná-yà nùù Jacobo, xì nùù stná nsidanicuú nècuàchì xínduu apóstol.

⁸⁻⁹ Daaní, último nì ndecunu-ya nùù yùhù. Díin tiempu nì sandua, màdì iin-ni xi nècuàchì dava ga mà. Vàchi nùù nsidaa gá ana nì nihì chuun nùù-yá, yùhù nduí ana chicá có-ndiàá. Ndisa nì nihì chuun

ndiaha nùù-yá, doco màdì sáhà-ñá vaha güé` nì sándúá; còó, vàchi yùhù, cuàhà gá nèhivì xí Dios nìsa quida quini xí.

¹⁰ Doco sàhà gracia xi-ya nì nìhìtáhvì' cucumí chuun ìì nùù-yá. Te màdì uun-ni sàni quee gracia nì quida-ya mà, vàchi cuàhà gá chuun ndiaha sàni quide, dècuèndè chicá más sàni quide nùù nècuàhì òdava ga. Doco màdì ndisa yùhù nì quidà-xì nsidaa ñà-ndiaha ma; còó. Divi gracia xi-ya nì chindee xí.

¹¹ Doco có-quidámà, a sea yùhù, ò òdava ga apóstol, doco iin-ni xíachi nsidaa-nsí sàhà Jesús ñà-nì natiacu ndisa-ya, te divi palabra jaàn nduá nì xinindisá stná mii-nsiá.

Nansa icúmí-ndá natiacu-ndá

¹² Pues, nú ducán cachí-nsì sàhà Cristu ñà-nì natiacu ndisa-ya, dandu ¿índù chuun cachí òdava-nsia ñà-mà cúí natiacu ni-iin nsì?

¹³ Vàchi nú mà cúí natiacu nsìi ni cúí, dandu ni cóni nátiácú stná mii-yá.

¹⁴ Te nú cóni nátiácú-yà nì cúí, dandu uun-ni quee ñà-cáhàn-nsì xì nèhivì. Stná mii-nsiá, sàni xinindisá stná-nsiàyà, doco uun-ni quee stná mà nì cúí.

¹⁵ Te nsiùhù tu, na ian tnuhu-nsí cuní cachàmà, vàchi sàni cachí-nsì sàhà Dios nì òdánátiácú-yà Cristu. Doco nú mà cúí natiacu ni-iin nsìi (nacua cachí òdava-nsia), dandu ñà-cóni nátiácú stná Cristu nduú stná mà.

¹⁶⁻¹⁷ Vàchi nú mà cúí natiacu nsìi, dandu cóni nátiácú stná mii-yá, te iin-ni iá ìì-ndà xì cuàchi-nda, cuquídá-xí nì xinindisa-nda, nú ducán.

¹⁸ Te divi ducán stná xì nèhivì xí-yá sàni caxihì, ñà-sàni ndañuhu dahuun stná-nè nduá, nú ducán.

19 Cunaha-nsiá, nèhivì chicá còò tnùndé inì-xi nduu-nda nú cuisì ñuhiví yohó-ní chindéé Cristu ndohó.

20 Doco (còò, ñà-ndáà cuisì nduá) sàni nati-acu-yà; dihna mii-yá nì natiacu-yà, dandu después icúmí natiacu stná cuàhà gá ana nì xìhì.

21 Sàhà cuàchi nì quida iin tiàa sàhana nì quesaha nèhivì xìhì-nè. Doco vichi sàhà (mii-yá) ana nì nanduu na iin tiàa, ñàyùcàndùá vètùni nìhìtáhvi stná cuàhà-né natiacu-nè.

22 Vàchi sàhà-ñá nduu-nda descendencia xi Adán, ñàyùcàndùá xìhì nsidaa nèhivì tiempu vichi. Doco nsidaa ana ndoó ladu xi Cristu, icúmí-nè sàà-nè natiacu-nè quida-ya.

23 Doco diín nduú quivì nì natiacu Cristu, te diín cunduu quivì quida tocar dava ga nèhivì. Dihna mii-yá nì natiacu-yà, te mii-yá nduú primeru nì cuu xi ducán; daaní, después natiacu stná ndohó nèhivì xí-yá quivì (naxicocuîn-yà, te) cuni-ndáyá.

24 Daa cunduu quivì icúmí-yâ cundee-yá nùù nsidaa ñà-malu cusáhnû, xì nùù stná nsidaa ana itá fuerte, xì nùù nsidaa gá stná ñà-fuerte iá ñuhiví. Daaní icúmí sàà quivì xìnu tiempu, te dayáha Cristu chuun dandacú-yá ndè ndahà Yuamáni-yá.

25 Doco antes ñà-jaàn, iin-ni icúmí-yâ cusahnú-yá dècuèndè cundee-yá nùù nsidaa ana xiní ùhì xì-yá.

26 Pues sàhà ñà-yáha ga có-cùdî ini-yà xìhì nèhivì, ñàyùcàndùá por último icúmí-yâ cundee-yá nùù ñà-xìhì-ndà, te mà nunca cui gà-ndà.

27 Vàchi cachí tutu ì ñà-ìcúmí sàà nsidanicuú iñàha coa sujetu nùù-yá. Doco náhà xìcà màdì Yuamáni-yá coo stná sujetu nùù-yá, vachi divi

Yuamánì-yá nduú ana disáhà-xí nì cundee-yá nùù nsidaa ana xiní ùhì xì-yá.

²⁸ Daaní, nú sàni cundee-yá nùù nsidaa contra xi-ya mà, dandu stná mii-yá, coo stná-yà sujetu nùù Yuamánì-yá, vèchi divi sàhà poder xi yà-yùcán nì cundee-yá ducán. Dandu quivì mà, mii Yua-nda Dios cunduu ana cusáhnù inicutu.

²⁹ Inga casu: dava stná nèhivì, sáhàn-nè cuhî-né cuenta xi nèhivì sàni xihì. Pues, ¿índù chuun quidá-né ducán, cuhî-né sàhà nsì ma nú ndisa mà cúí natiacu ni-iin nsì ni cúí?

³⁰ Daaní, nsiùhù tu, tìxi cuàhà peligru ndoó-nsí nsidanicuú tiempu. (Doco uun-ni queamà nú mà sàà-ndà natiacu-ndà después.)

³¹ Quivì quívì yáha-nsi peligru cui-nsì, ñáni. Ñà-ndàà cuisì nduájàn divi nacua nduú stná ñà-ndácuisì cudî gá inì sàhà-nsiá ñà-iin-ni nchícùn stná-nsiá Stoho-ndà Jesucristu.

³² Yùhù, cuàhà vida nì xinì ñuu Éfeso nùù (nèhivì dana guá nahi) nsicaha. Doco ni mà cúndiáá stná mà (nú) nú mà nunca sàà-ndà natiacu-ndà. Vèchi te nú ducán, dandu chicá vaha quida-nda nacua cachí dichu: “Ni cuxí vaha-nda, te coho vaha-nda, vèchi tnaa cui-ndà”.

³³ Màsà cuàha-nsia dandahví ni-iin nèhivì-nsiá (ducán, vèchi cachí stná dichu): “Nú chicuèhè nècuàchè nduú compañeru-ndà, dandu cuchicuehe stná modo xi-nda”.

³⁴ Xiñuhu nàcùnihnu vii inì-nsia, (ñáni). Màsà quidá gá-nsiá cuàchi, vèchi sàni cundaà inì, dava-nsia ni có-ínáhá-nsiá Dios. Ducán cachí xì-nsiá àma ndúcáhn-nsiá (nacua ndiá icà-nsiá).

Nansa coo iquicúñú-ndà na natiacu-ndà

³⁵ Doco vihini cachi iin nèhivì: “¿Índù modo cui natiacu iin nsii nú sàni xihì-nè? ¿Nansa cuàhàn coo iquicúñú-nè?”

³⁶ Pues neciu-ndà nú ni cachí-ndà ducán. Vàchi dècuèndè stná tata chihì-ndà, icúmíà ndùxan, dandu cuitià.

³⁷ Te tata chihì-ndàmà, có-ndùdává xí ñà-nduá cuàhàn nacuitià; còó, cutu íin tata uun nduá chihì-ndà, sea ni cúnduá nùni trigu, ò inga nùni.

³⁸ Dandu dacuahnú Dios-ñà, te sàà coa nacua nì chitnùní ini-yà coa. Te nú sàni sahnua, dandu díin díin nùni cundua según iin iin clase nduá.

³⁹ Pues ducání iá stná xì cuerpu xi iin iin ñà-íá ñuhiví. Vàchi tucu tucu ndáa nèhivì, quisi, laa, siaca.

⁴⁰ Stná ñà-nchií itándiaa ansivi, tucu iá` nùu ñà-íá ñuhiví yohó. Cuaha-ni iá ñà-íá ansivi, te cuaha-ni iá stná ñà-íá ñuhiví, doco tucu tucu xíndàa vico iin ian.

⁴¹ Ndiaha gá nchií orá, te viconi iá nchií yoo, doco tucu nchií-si. Cuaha-ni iá nchií stná sitnúu, doco tucu tucu xíndàa vico iin iin-si.

⁴² Pues ducán icúmí coo stná xì ndohó quivì natiacu-ndà, tucu nàcòo stná cuerpu xi-nda. Nú sàni ndùxin iin nsii, sívì iquicúñú-nè, doco na sàà quivì natiacu-nè, iin-ni mà cúí gà-nè.

⁴³ Te mate mà cuáhá-ní nisá ìa-ne na ní ndùxin-ne, doco ndiaha gá nàcòo-ne quivì natiacu-nè. Te còò gá ni-iin fuerza iin nsii na ndúxin-ne. Doco nú sàni natiacu-nè, yáha ga fuerte ndiaha nàcòo-ne.

⁴⁴ Iin iquicúñú ñuhiví yohó icúmí-ndá na ndúxin-nda. Doco nú sàni natiacu-ndà, dandu cuerpu ndiaha cundua, vètùni cundoo-nda gloria.

Cuerpu xi-nda icúmí-ndá vichi, iin ñà-cundoo-nda ñuhìví yohó nduá, doco cunaha-nsiá, icúmí coo stná iin ñà-cundoo-nda inga ñuhìví.

⁴⁵ Te dohó cachí stná nùù tutu ì: “Tiàa nì cuyucun primeru, nì sàcùnduu-ne iin nèhivì itiácú, divi nduú Adán”. Doco iá stná inga ana nduú nahi Adán, divi mii-yá nì quixi nchícùn gà, te nùù anima mii-yá níhìtáhvì nèhivì vida ndiaha.

⁴⁶ Doco ¿nansa nìsa ìa iquìcúñú nècuàchì nì quixi primeru mà? Pues divi primeru nì sàcòo iquìcúñú cui coo ñuhìví yohó-ní, te màdì ñà-nduá itiácú ndiaha na iin Espíritu ì. Còó, siempre nchícùn gà vàxamá.

⁴⁷ Ñàyùcànduá, nècuàchì primeru yucán, ñuhù ñuhìví yohó nì cuyucun-nè; doco ana nchícùn gà nì quixi ma, ansivi ní quixi-ya, te divi Stoho-ndà Señor nduú-yá.

⁴⁸ Nèhivì ñuhìví, nacua nìsa ìa xì-né nì cuyucun ñuhù, ducán xíndaa stná-nè vichi. Doco nsidaa nèhivì nduú nèhivì cuenta xi gloria, divi nacua iá mii-yá iá gloria, ducan xíndaa stná-nè.

⁴⁹ Ñàyùcànduá, tiempu vichi ndáa-nda nahi xì-ndà nì cuyucun ñuhù, doco después icúmí-ndá nàcùnduu-nda nacua iá mii-yá iá gloria.

⁵⁰ Doco cunaha-nsiá, na xínduu ì-ndà nèhivì ñuhìví yohó xì iquìcúñú-ndà, tàñáha ga cui sàà-ndà cundoo-nda ñuhìví ì xí-yá, ñánì. Te ducání stná, nú tàñáha ga dàma iquìcúñú-ndà, mà cúí sàà stná-ndà cundoo-nda ndé mà sívì gà iquìcúñú-ndà; vàchi tiempu vichi sívì-ndà na xíhì-ndà.

⁵¹ Ñàyùcànduá, cuàhìn cachì xì-nsiá iin palabra nìsa ìa dèhé antes; cunaha-nsiá, mà sàà nsidaa-nda

cui-ndà; doco nsidaa-nda icúmí-ndánadàma iquìcúñú-ndà.

⁵² Na tiácú sivi corneta último, dandu yáha ga yàchì, na íin cáchî nadàma dahuun-nda. Vàchi icúmí sivi corneta, dandu natiacu nsii ñà-mà cúí gà-nè.

⁵³⁻⁵⁴ Tiempu vichi xíhì nèhivì ñuhiví, te sívì-né; doco ndohó, vaxi iin quivì dandu nadàma-nda, dandu nicanicuahàn cunaha iquìcúñú-ndà. (Ñà-ndáà nduá), xíhì-ndà vichi, doco nú sàni nadàma iquìcúñú-ndà, dandu mà nunca cui gà-ndà. Daaní, (na tiempu sàni nihitáhvì-ndà ducán), dandu ñà-sàni cuu ndisa palabra cachí tutu ìi cundua, vàchi dohó cachá: “Vichi ndisa sàni cundee dahuun Dios; mà cundúú gà-ndà nsii.

⁵⁵ Na ní xihì-ndà, cuàhàn-ndà ndoho fuerte-ndà nì cúí, doco vichi còó. Mate ní xihì-ndà, doco mà nunca cundee gà tnùndoho ma nùù-ndà”, cachá.

⁵⁶ Pues sàhà ñà-íá cuàchi nèhivì, ñà-yùcán nduá dayúhî xì-né na xihì-nè. Vàchi nacua fuerte íá castigu cachí ley ìi, ducán fuerte icúmí coo stná tnùndoho nihì-né sàhà cuàchi nì quida-ne.

⁵⁷ Doco nùù ndohó, còó, vàchi ansivéhé Dios, vátùni cundee-nda nùù nsidaájàn quida Stoho-ndà Jesucristu.

⁵⁸ Ñàyùcànduá, iin-ni xiñuhu-ñá nacuàhandee ini-nsià, ñani màní. Iin-ni ni cúníhnú vàha ini-nsià Stoho-ndà Señor, te quida stná-nsià cuàhà obra ndiaha xí-yá, vàchi ináhá-ndá, màdì úún-ní quee ñà-xinúcuáchí-ndá nùù-yá.

16

Nansa nì xicàn Pablo nùù nècuàchì ñuu Corinto

ñà-datacá-nè cooperación sàhà nècuàchè ndahví

¹ Vichi cuàhìn càhìn xì-nsiá sàhà nansa quida tnaha-nda cooperar ñà-chindee-nda dava ga nèhivì xí Dios. Cunaha-nsiá, nacua nì cachì xì nèhivì xí-yá ndoó ladu Galacia, ducán cunî quida stná mii-nsiá.

² Cada quivì domingu xiñuhu tavà cuàán iin iin-nsia iyuhu ñà-nduá sàni quida-nsia ganar, dandu quivì sài ndé ndoó-nsiá, có-nduú gá ñà-càcàn gà-nsiá dihùn.

³ Te nú sàni sài, dandu icúmí stnâ-nsiá nacàxin-nsia iin ùi nèhivì techuín cùhùn ñuu Jerusalén ñà-cunihi-ne tnùmanì xí-nsiá cùhùn. Te icúmí tiaa stnái iin carta cunihi-ne cùhùn ñà-nduá iin chuun vaha.

⁴ Te nú tuxí inì vètuni cùhùn stnái, dandu cutnàhí xì nècuàchèmà cùhùn-nsi.

Nansa nihnú ini Pablo cacanuú ga-nè ñuu te ñuu

⁵ Yùhù nihnú inì quihin ichì cùhìn ladu Macedo-
nia. Te nú sàni yàhi ladu yucán, dandu icúmí sàà
stnái ndé ndoó mii-nsiá ñuu Corinto jaàn.

⁶ Te vihini coo chíí xì-nsiá jaàn cahín, dècuèndè
vihini coi inii tiempu vixin, dandu después
chindee-nsiá yùhù cùhìn chicá nùù-xí ndé icúmí
cùhìn.

⁷ Vàchi có-cunî yàha uin ndé ndoó-nsiá; có-cunî
casàhú uin xì-nsiá. Cahnú gà Dios siquiera iyuhu
tiempu cunî coi cutnàhí xì-nsiá.

⁸ Doco vichi cuàhìn coi ñuu Éfeso yohó dècuèndè
nacava vicò Pentecostés;

⁹ vàchi ñuu yohó, ndiaha gá-sàni nuna ñuhiví
nduá, vàchi sà-íá cuàhà chuun xi mii-yá quida-nsi,
mate ndoó cuàhà stná ana xidà inì-xi.

10 Nú ni sàà Timoteo ndé ndoó-nsiá, quidañuhu-nsiánè sàhà ñà-ni còó-né contentu na iá-nè jaàn, vàchi iin-ni quidá stná-nè chuun xi Stoho-ndà Señor, nahi yùhù.

11 Ñàyùcàndùá, màsà cáhîchì inì-nsianè. Te chindee-nsiánè na naquihin-ne ichì ndixi-ne ndé ié', vàchi ndiatuí-nè nsiaa-nè xì compañeru-nè.

12 Daaní, ñani-ndà Apolos, cuàhà gá nì sacundahví nùù-né áma cútnáhâ-né xì compañeru-nsi sàà-nè ndé ndoó-nsiá. Doco có-ìá-nè dispuestu cùhùn-nè vichi-ni. Ndè iin quivì chicá cusaa-ne, dandu sàà-nè.

Nansa ni cachi Pablo ni casàhú-nè xì nsidaa nèhivì xì Dios ndoó ñuu Corinto

13 Cundoo tùha-nsia (ñà-màsà dándáhvì nèhivì-nsiá). Iin-ni cunindisá vàha-nsia, te cunihnu fuerte ini-nsiá, te nacuahandee stná ini-nsiá.

14 Nsidanicuú chuun icúmí-nsiâ xì ñanìtnaha-nsia, màsà nándodó-nsiá cuu manì stnahá ini-nsiá sàhà-nsiá.

15 Ináhá-nsiâ sàhà Estéfanos xì nsidaa nèhivì vehe-ne, ñà-xínduu-ne nèhivì primeru nì xinindisa-xi mii-yá jaàn ladu Acaya. Te ináhá stná-nsiá ñà-cuàhà guá voluntad icúmí-né chindee-né nsidaa nèhivì xì Dios, ñáni.

16 Ñàyùcàndùá, cunî quidañuhu stná-nsiánè xì nsidaa stná ana nihnú ini-xi nahi mii-né, xì nsidaa gá stná nècuàchì xinúcuáchì nùù-yá, te chindéé sàhà chuun nsiha, cunî quidañuhu víi-nsiánè.

17 Nì cudii gá inì na ní quesaa Estéfanos xì Fortunato xì Acaico, vàchi mate mànicúì quixi mii-nsiá, doco siquiera mii-né nì quesaa-nè, te sàhájàn sà-ìé' contentu.

18 Sàni nacuahandee ini-nè anímè, te divi ducání tùha stná-nè quida-ne xì mii-nsiá, ináhî. Ñàyùcànduá, xiñuhu quidañuhu víi-nsiánè, mii-né xì nsidaa gá stná nèhivì nahi mii-né.

19 Nsidaa nèhivì natácá càhvì xì Dios ladu Asia yohó, cásàhú-nè xì-nsiá. Te cásàhú stná Aquila, xì Priscila, xì nsidaa gá stná nèhivì natácá vehe-ne; cuahà gá (cudî ini-nè) ñà-ndòó-nsiá ladu xi mii-yá.

20 Nsidanicuú nèhivì xí-yá (ladu yohó), cásàhú-nè xì-nsiá. Te mii-nsiá, nacasàhú stnahá víi stná-nsià ñà-ndùú-nsiá nèhivì ìì xí-yá.

21 Ndahà yùhù Pablo tiaí palabra yohó, te cásàhú stnáì xì nsidaa-nsiá.

22 Nú iá ana có-cùú inì-xi sàhà Stoho-ndà Jesucristu, dandu ni sàà-nè ndañuhu-né nùù-yá. Te vichi cachí-ndà xì-yá: “Naxicocuîñ-ní cuní-nsì, Stoho-nsì Señor”.

23 Nì cúcúmí víhí-nsiâ gracia xi Stoho-ndà Jesucristu.

24 Te cuní nsinuu inì-nsia nansa cuú inì sàhà-nsiá ñà-iin-ni xínduu-nda nèhivì xí Jesucristu. Sà-íá.

Ley saa ni nacoo Jesucristu
New Testament in Mixtec, Southern Puebla
(MX:mit:Mixtec, Southern Puebla)

copyright © 1978 Wycliffe Bible Translators, Inc.

Language: (Mixtec, Southern Puebla)

Translation by: Wycliffe Bible Translators, Inc.

Mixteco, Sur de Puebla [mit], Mexico

Copyright Information

© 1978, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Southern Puebla

© 1978, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-21

PDF generated using Haiola and XeLaTeX on 18 Apr 2025 from source files
dated 29 Jan 2022

8a6c83d1-922b-5d25-99ec-4724168f3b77